



Bab 41

KESEMPITAN DAN KELAPANGAN

وَوَصَّيْنَا الْإِنْسَانَ بِوَالِدَيْهِ إِحْسَانًا حَمَلَتْهُ أُمُّهُ كُرْهًا وَوَضَعَتْهُ كُرْهًا وَحَمْلُهُ
وَفِصَالُهُ ثَلَاثُونَ شَهْرًا حَتَّىٰ إِذَا بَلَغَ أَشُدَّهُ وَبَلَغَ أَرْبَعِينَ سَنَةً قَالَ رَبِّ أَوْزِعْنِي
أَنْ أَشْكُرَ نِعْمَتَكَ الَّتِي أَنْعَمْتَ عَلَيَّ وَعَلَىٰ وَالِدَيَّ وَأَنْ أَعْمَلَ صَالِحًا تَرْضَاهُ
وَأَصْلِحْ لِي فِي ذُرِّيَّتِي إِنِّي تُبْتُ إِلَيْكَ وَإِنِّي مِنَ الْمُسْلِمِينَ.

“Dan Kami wasiatkan (wajibkan) manusia berbuat baik kepada kedua ibu bapanya; ibunya telah mengandungnya dengan menanggung susah payah dan telah melahirkannya dengan menanggung susah payah. Sedang tempoh mengandungnya beserta dengan tempoh menceraikan susunya ialah dalam masa tiga puluh bulan. Setelah dia besar sampai ke peringkat dewasa yang sempurna kekuatannya dan sampai ke peringkat umur empat puluh tahun, berdoalah dia dengan berkata: “Wahai Tuhanku, ilhamkanlah daku supaya tetap bersyukur akan nikmatMu yang Engkau kurniakan kepadaku dan kepada ibu bapaku, dan supaya aku tetap mengerjakan amal soleh yang Engkau redhai; dan Jadikanlah sifat-sifat kebaikan meresap masuk ke dalam jiwa zuriat keturunanku. Sesungguhnya aku bertaubat kepadaMu, dan sesungguhnya aku dari orang-orang Islam (yang tunduk patuh kepadaMu)” Al-Ahqaaf: 15



Kami bersama Saiyidina As-Syeikh Al-Kamil Abdun Nasir Abu Bakr As-Siddiq Al-Hasani -moga Allah meredhoinya dan dan mengurnia kita kemanfaatannya dunia Akhirat- dalam satu majlis zikir, tarbiyyah dan suluk. Lalu seorang murid bertanya kepada beliau: “Apa sikap kita terhadap ahli engkar yang menyalahkan majlis-majlis kita dan majlis zikir secara umum sedangkan ia merupakan majlis maghfirah dengan izin Allah dan taufikNya?” Saiyidina -moga Allah meredhoinya dan menyampaikan keredhoan buatnya- pun menjawab: “Sabda junjungan Saiyidina wa Maulana Muhammad ﷺ:

حَدِّثُوا عَنِ بَنِي إِسْرَائِيلَ وَلَا حَرَجَ

“Ceritakanlah tentang Bani Israil, itu tidak ada salahnya”

...ertinya kamu bicarakanlah tentang para ahli engkar yang mengengkari hadrat awliya’, solihin dan majlis-majlis mereka... tiada salahnya kamu membicarakannya kerana kamu dengan cara ini kamu menyelamatkan masyarakat dari jatuh kepada keingkaran dan penentangan yang boleh melarat sesudah itu menjadi bongkak terhadap kebenaran lalu kekufuran wal’iyadzu billah.”

Saiyidina sesudah itu membentangkan berbagai contoh mengenai perkara ini. Amat malang kerana ramai orang jatuh ke dalamnya dengan niat atau tidak sengaja. Kepada Allah kita bermohon agar Dia menyelamatkan dan menjaga kita dari sikap engkar, penentangan dan menyalahi. KepadaNya lah kita berharap dan memohon agar Dia merezekikan kita sifat tasdiq (percaya), iktiqad yang baik dan taslim (pasrah) pada setiap urusan kita yang zahir dan batin. Allahumma amin.

Kita sambung lagi pada siri kali ini dengan bicara adab-adab *al-qabdh* (kesempitan) dan *al-basth* (kelapangan), juga mengenai adab-adab *al-faqd* (kehilangan) dan *al-wajd* (perolehan).

Mengenai adab-adab *qabdh* dan *basth* Saiyidna As-Syeikh As-Syazili -moga Allah meredhoinya dan menyampaikan keredhoan

buatnya- berkata: “Al-Qabdh (rasa sempit yang amat sangat, kadar tekanan kesempitan itu berbeza-beza pada tiap orang) dan al-basth (rasa gembira, senang hati dan lapang dada. Kadar kekuatannya juga berbeza-beza pada tiap orang)... jarang sekali ada hamba yang terlepas dari kedua perkara ini (khususnya bagi penempuh jalan Akhirat). Keduanya datang silih berganti seperti silih bergantinya malam dan siang.

“Sedangkan Allah yang namaNya Al-Haq itu menuntut ‘ubudiyyah (kehambaan) darimu (duhai salik) pada kedua-dua keadaan itu. Maka siapa yang ditimpa qabdh pada waktunya sebenarnya tidak sunyi dari mengetahui sebab kesempitan itu atau dia memang tidak mengetahuinya.

“Bermula penyebab qabdh itu tiga:

- Dosa yang dilakukan
- Perkara dunia yang hilang atau berkurangan darimu
- Orang zalim yang menyakiti pada hartamu, atau dirimu, atau pada kehormatanmu, atau dia menisbahkanmu kepada selain agama, atau lainnya.

“Jika qabdh mendatangimu dari salah satu sebab-sebab ini maka tuntutan ‘ubudiyyah ialah engkau kembali kepada ilmu dan mengamalkannya (menggunakannya dalam proses rawatan) sepertimana perintah syarak kepadamu. Pada soal dosa maka rawatannya dengan taubat, kembali kepadaNya dengan penyesalan dan mohon dilepaskan dari dosa itu. Pada perkara dunia yang pergi atau berkurangan darimu maka rawatannya dengan taslim (pasrah), redho dan mengharap pahala. Pada si zalim yang menyakitimu rawatannya ialah dengan sabar.

“Awaslah! Jangan engkau zalim pada dirimu dengan memenangkan nafsumu hingga engkau melanggar hak si zalim lalu terhimpunlah padamu dua kezaliman:

Kezaliman orang lain terhadapmu dan



Kezalimanmu terhadap dirimu sendiri.

(Renungilah betapa seninya tarbiyyah dan adab).

“Apabila engkau melakukan apa yang sewajibnya bagimu dari kesabaran dan menanggung beban nescaya Dia akan mengganjarimu dengan dadamu merasa lapang hingga kamu dapat memaafkan. Boleh jadi Dia akan mengganjarimu dengan dari cahaya keredhoan atas kasihan belasmu terhadap orang yang menzalimimu lalu engkau mendoakan kebaikan padanya maka doamu diperkenankan.

“Alangkah baiknya yang demikian itu jika dengan denganmu Allah merahmati orang yang menzalimimu. Yang demikian itu darjat golongan siddiqin dan mereka yang berkasih sayang.

فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ.

“...maka bertawakkallah kamu kepada Allah, sesungguhnya Allah mencintai mereka yang bertawakkal” Aali `Imran: 159

“Adapun jika kamu didatangi qabdh tanpa mengetahui dari mana sebabnya, maka waktu ada dua: (1) malam dan (2) siang. Qabdh itu amat serupa dengan malam sedangkan basth pula amat serupa dengan siang.

“Jika datang kepadamu qabdh tanpa sebab yang engkau ketahui waka wajibilah ke atasmu untuk bertenang diri (tenang, taslim dan redho). Bertengan itu dari tiga perkara; dari (1) perkataan, (2) segala gerakan dan (3) kehendak.

“Jika engkau telah melakukan yang demikian itu maka dengan segera malam akan pergi dengan terbitnya siang. Atau akan kelihatan padamu bintang yang dapat kau jadikan petunjuk, atau bulan yang menyuluhmu, atau mentari yang menerangkan penglihatanmu.

“Adapun bintang itu adalah bintang ilmu, bulannya adalah bulan tauhid dan mentarinya adalah mentari makrifat. (Lihatlah betapa

indahNya takrif-takrif ini). Jika engkau bergerak dalam zulmat malammu maka sukarlah engkau untuk selamat dari kebinasaan. Dan ambillah iktibar dari firmanNya:

وَمِنْ رَّحْمَتِهِ جَعَلَ لَكُمُ اللَّيْلَ وَالنَّهَارَ لِتَسْكُنُوا فِيهِ وَلِتَبْتَغُوا مِنْ فَضْلِهِ وَلَعَلَّكُمْ تَشْكُرُونَ.

“Dan diantara rahmatNya Dia menjadikan untukmu malam dan siang, supaya kamu beristirahat di malamnya dan (di siangnya) supaya kamu mencari sebahagian dari kurniaNya dan agar kamu bersyukur kepadaNya” **Al-Qasas: 73**

“Maka inilah hukum ‘ubudiyyah dalam kedua-dua qabdh (yang diketahui sebab dan yang tidak diketahui).

“Adapun orang yang waktunya bath maka tidak terlepas dia sama ada mengetahui sebabnya atau memang dia tidak mengetahuinya. Adapun sebabnya tiga:

Sebab pertama: kerana bertambah ketaatan dengan zikir, ibadat dan selainnya, atau kerana anugerah dan beroleh sesuatu dari yang dipatuhi seperti ilmu dan makrifat.

Sebab kedua: kerana bertambah dalam perkara dunia dengan usaha atau kemuliaan, atau pemberian, atau hubungan.

Sebab ketiga: kerana pujian dan sanjungan dari masyarakat, mereka memandangmu, mereka minta doa darimu dan mencium tanganmu.

“Maka jika bath mendatangimu dari salah satu sebab-sebab ini maka ‘ubudiyyah menuntut engkau melihat nikmat dan budi itu dari Allah buatmu dalam ketaatan dan taufik padanya serta memudahkan sebab-sebab berlakunya nikmat itu. Awas! Jangan engkau melihat itu dari dirimu sendiri. Benteng yang paling khusus dan paling afdhal ialah rasa takut sentiasa melazimimu; takut ditarik nikmatNya darimu (jika ditarik nikmat darimu, atau engkau dihalau wal’iyadzubillah) jadilah



Bekalan Murid Ke Jalan Akhirat

engkau hamba yang dimurkai (Robbana! Selamatkanlah kami demi jaah Sidnan Nabi ﷺ). Ini dari segi ketaatan dan anugerah Allah Taala.

“Adapun pertambahan keduniaan juga merupakan nikmat seperti sebab yang pertama tadi. Dan takutlah engkau dengan sebenar-benar takut dengan yang batin pada dunia itu; penyakit, perangkap dan jeratnya, ke mana alirannya, dari mana perolehannya dan lain-lain perkara yang bersangkutan dari yang wajib, sunat dan haram mengenainya.

“Adapun puji dan sanjungan manusia kepadamu, emereka mencium tanganmu, menurut arahanmu... maka `ubudiyyah menuntut agar nikmat disyukuri kerana Dia telah menutupi [kebaikan]mu. Dan takutlah engkau dengan sebenar-benar takut kepada Allah kerana bimbang akan terzahir barang sebesar zarah apa yang terbatin dalam dirimu (dari kejahatan dan keburukan) lalu orang yang paling rapat denganmu pun akan membencimu.

“Adapun bath yang tidak diketahui sebabnya maka hak `ubudiyyahnya adalah meninggalkan sikap meminta, memperhina dan menyerang baik kepada lelaki mahupun perempuan (ertinya jangan engkau berbuat makar dan menghina mereka). Kecuali engkau berkata:

رَبِّ سَلِّمْ رَبِّ سَلِّمْ

“Robbi selamatkanlah... Robbi selamatkanlah”

...hingga mati. Maka inilah adab-adab qabdh dan bath dalam `ubudiyyah seluruhnya jika engkau berakal wahai si murid penuju Allah.

Saiydina As-Syeikh As-Syazili -moga Allah meredhoinya dan mengurnia kepada kita kemanfaatannya dunia Akhirat- berkata: “Ketahuilah bahawa faqd dan wajd itu silih berganti datang kepada kita seperti silih pergantian malam dan siang. Adapun peredaran perkara ini pada empat keadaan:

Syukurilah nikmat Allah jika engkau memperoleh (wajd)nya dan redholah engkau kepada Allah jika engkau hilang (faqd) sesuatu.

Curahkanlah kurniaNya padamu [sebagai mensyukuri kurnia] dan janganlah engkau menyedihkan kesyukuran itu nanti ia sedih (menahan dirinya) darimu. Tapi sedihkanlah amanah apabila makin bertambah dan engkau makin tinggi.

Berserahlah kepada Allah dalam tiap perkara yang engkau tuju

فَإِنْ حَاجُّوكَ فَقُلْ أَسْلَمْتُ وَجْهِيَ لِلَّهِ وَمَنِ اتَّبَعَنِ

“Jika mereka mendebatimu (tentang kebenaranmu) maka katakanlah: Aku telah menyerahkan diriku kepada Allah (demikian pula) orang-orang yang mengikutku” Ali `Imrah: 20

Dan janganlah engkau menjadi ‘abid (ahli ibadah) yang berat (mengerjakan), jangan kau jadi zahid (ahli zuhud) yang degil, jangan kau jadi `aashi (ahli maksiat) yang memberontak, jangan kau jadi muftari (orang yang mengada-ngadakan cerita) yang ingkar.

Jika engkau telah melepasi empat perkara yang pertama tadi maka sesungguhnya telah masuklah engkau ke dalam sanjungan Allah Tabaroka wa Taala dalam firmanNya:

شَاكِرًا لِّأَنْعَمِهِ اجْتَبَاهُ وَهَدَاهُ إِلَى صِرَاطٍ مُسْتَقِيمٍ

“(Dia itu seorang hamba) yang mensyukuri nikmat-nikmat Allah dan Allah telah memilihnya dan memberinya petunjuk ke jalan yang lurus” An-Nahl: 121



Bab 42

TAKLIF, IKUTAN DAN ADAB MUJALASAH

رَبِّ أَوْزِعْنِي أَنْ أَشْكُرَ نِعْمَتَكَ الَّتِي أَنْعَمْتَ عَلَيَّ وَعَلَى وَالِدَيَّ وَأَنْ أَعْمَلَ صَالِحًا تَرْضَاهُ وَأَصْلِحْ لِي فِي ذُرِّيَّتِي إِنِّي تُبْتُ إِلَيْكَ وَإِنِّي مِنَ الْمُسْلِمِينَ.

“Wahai Tuhanku, ilhamkanlah daku supaya tetap bersyukur akan nikmatMu yang Engkau kurniakan kepadaku dan kepada ibu bapaku, dan supaya aku tetap mengerjakan amal soleh yang Engkau redhoi; dan Jadikanlah sifat-sifat kebaikan meresap masuk ke dalam jiwa zuriat keturunanku. Sesungguhnya aku bertaubat kepadaMu, dan sesungguhnya aku dari orang-orang Islam (yang tunduk patuh kepadaMu)” **Al-Ahqaaf: 15**

Demikianlah selalu dan berulang kali ku dengar kata-kata ini dari Saiyidina As-Syeikh Abdun Nasir رَضِيَ اللَّهُ عَنْهُ وَأَرْضَاهُ dalam berbagai peristiwa. Tuhan kita yang maha memberi rezeki dan maha banyak memberi rezeki telah berfirman dalam ketetapan kitabNya yang mulia:

قُلْ مَا أَسْأَلُكُمْ عَلَيْهِ مِنْ أَجْرٍ وَمَا أَنَا مِنَ الْمُتَكَلِّفِينَ .. إِنَّهُ هُوَ إِلَّا ذِكْرٌ لِلْعَالَمِينَ
وَلِتَعْلَمَنَّ نَبَأَهُ بَعْدَ حِينٍ ..

“Katakanlah (wahai Muhammad): "Aku tidak meminta kepadamu

sebarang bayaran kerana menyampaikan ajaran Al-Quran ini, dan bukanlah aku dari orang-orang yang mengada-ngadakan". Al-Quran tidak lain hanyalah peringatan bagi warga seluruh alam. Dan demi sesungguhnya, kamu akan mengetahui kebenaran perkara-perkara yang diterangkannya, tidak lama lagi" **Shod: 86-88**

Fokuskanlah pada firmanNya "...dan bukanlah aku dari orang-orang yang mengada-ngadakan" yang bererti perkara yang ditanggungkan ke atasku ini adalah taklif (bebanan) yang tak bertanggung melainkan dengan menggagahi diri menanggungnya.

Taklif adalah sesuatu yang berat ditanggung manusia. Firman Allah Tabaroka wa Taala:

لَا يُكَلِّفُ اللَّهُ نَفْسًا إِلَّا وُسْعَهَا

"Allah tidak memberati satu jiwa melainkan apa yang mampu ditanggung olehnya" **Al-Baqarah: 286**

Sabda junjungan Saiyidina wa maulana Muhammad Rasulullah ﷺ:

أَنَا وَأَتَقِيَاءُ أُمَّتِي بُرَاءٌ مِنَ التَّكْلِيفِ

"Aku dan golongan bertaqwa dari umatku tiada kena mengena dengan sikap memberat-berati diri"

Dalam pepatah ada menyebut:

لَا يَكُنْ حُبُّكَ كَلْفًا وَلَا بُغْضُكَ تَلْفًا

"Janganlah kasihmu itu memberat-berati dan janganlah bencimu itu sampai menghapus"

Robbuna Azza wa Jalla berfirman dalam kitabNya yang agung Al-Quranul Karim:



Bekalan Murid Ke Jalan Akhirat

إِنْ تَكْفُرُوا فَإِنَّ اللَّهَ غَنِيٌّ عَنْكُمْ وَلَا يَرْضَىٰ لِعِبَادِهِ الْكُفْرَ وَإِنْ تَشْكُرُوا يَرْضَهُ لَكُمْ

“Jika kamu kufur (ingkar tidak bersyukur akan nikmat-nikmatNya itu) maka ketahuilah sesungguhnya Allah tidak berhajatkan (iman dan kesyukuran) kamu; dan Dia tidak redhokan hamba-hambaNya berkeadaan kufur; dan jika kamu bersyukur, Dia meredhoinya menjadi sifat dan amalan kamu...” Az-Zumar: 7

Renungilah keagungan Allah Tuhan kita Subhanahu wa Taala “... dan Dia tidak redhokan hamba-hambaNya berkeadaan kufur.” Fokuskan perhatianmu kepada kalimah “hamba-hambaNya,” ertinya barang siapa yang tahqiq dirinya sebagai hamba kepada Allah yang Maha Esa lagi Maha Perkasa; sedang inilah prinsip, tujuan dan sasaran termulia lagi cita-cita tertinggi bagi golongan sufi Islami Sunni; yaitu merealisasikan `ubudiyyah kepada Allah Tuhan semesta alam, kemudian mengharap kepada Allah kemuliaan budiNya dengan mengurnia hamba kejujuran dalam `ubudiyyah kepadaNya Tabaroka wa Taala, yaitu darjat para muqorrobin kalangan awliya’ dan solihin. Perkara ini mudah bagi hamba yang memudahkan Allah, yang berjalan dan menempuh perjalanan, meniti tangga demi tangga dalam tingkatan kembara dan salik menuju Allah dengan berdamping kepada syeikh yang arif, yang sampai dan menyampaikan lagi kamil.

وَأَنَابُوا إِلَى اللَّهِ لَهُمُ الْبُشْرَىٰ فَبَشِّرْ عِبَادِ

“...dan mereka rujuk kembali taat kepada Allah, mereka akan beroleh berita yang menggembirakan; oleh itu gembirkanlah hamba-hambaKu” Az-Zumar: 17

Kemudian Robbuna Tabaroka wa Taala akan memuliakannya dan dia tahqiq dengan firmanNya:

أَمَّنْ هُوَ قَانِتٌ آنَاءَ اللَّيْلِ سَاجِدًا وَقَائِمًا يَحْذَرُ الْآخِرَةَ وَيَرْجُو رَحْمَةَ رَبِّهِ قُلْ هَلْ يَسْتَوِي الَّذِينَ يَعْلَمُونَ وَالَّذِينَ لَا يَعْلَمُونَ إِنَّمَا يَتَذَكَّرُ أُولُوا الْأَلْبَابِ

*"...atau orang yang taat mengerjakan ibadat pada waktu malam dengan sujud dan berdiri sambil takutkan (azab) hari Akhirat serta mengharapkan rahmat Tuhannya? "Katakanlah lagi (kepadanya): "Adakah sama orang-orang yang mengetahui dengan orang-orang yang tidak mengetahui?" Sesungguhnya orang-orang yang dapat mengambil pelajaran dan peringatan hanyalah mereka yang berakal sempurna" **Az-Zumar: 9***

Fokuskan perhatianmu kepada firmanNya (*ulul al-bab* = mereka yang berakal sempurna), yaitu mereka yang telah dibuka oleh Allah akan hati mereka untuk zikir kepadaNya. Mereka pun zikir mengingat Allah dengan zikir yang banyak, mata hati mereka pun bercahaya, akal mereka pun terbuka, ufuk pemikiran mereka jadi luas, begitu juga halnya dengan kefahaman, pandangan dan fikiran mereka. Mereka dimuliakan dengan kurnia persalinan makarimul akhlak kenabian ﷺ, masing-masing diberi berdasarkan maqam dan waktunya. Merekalah ahli hadrah, anak jantan pemberani lagi penyelamat. Merekalah para pengawal benteng pertahanan yang teguh janji setia, ahli kefahaman dan fatwa, merekalah para ulama robbani, merekalah bahtera keselamatan -moga Allah meredhoi mereka dan menyampaikan keredhoan buat mereka di mana saja mereka berada, semoga Allah memberi kemanfaatan mereka kepada muka bumi dan para abadinya. Allahumma amin.

Kita teruskan lagi pada siri kali ini dengan bicara pada topik al-iqtida' (mentauladani) dan adab-adab mujalasa (duduk bersama).

Mengenai iqtida' Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ berkata: "Aku telah bermimpi melihat Saiyidina wa Maulana Rasulullah ﷺ lalu aku berkata kepada Baginda: "Ya Saiyidi ya Rasulallah, apa hakikat dari mengikut?," maka jawab Baginda: "Melihat yang diikuti di sisi segalanya, bersama segalanya dan dalam segalanya."

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: "Syeikh adalah insan yang memberimu petunjuk kepada kerehatanmu di dunia dan Akhirat dengan zuhud, bukan orang yang memberimu petunjuk kepada apa yang melelahkanmu."



Bekalan Murid Ke Jalan Akhirat

Saiyidina As-Syazili رَضِيَ اللَّهُ عَنْهُ وَأَرْضَاهُ berkata lagi: “Seorang syeikh kamil itu bukan orang yang hidup pada dirinya, sesungguhnya syeikh kamil itu adalah orang yang menghidupi orang lain.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Syeikh kamil itu bukanlah orang jatuh sifat takut dalam dirinya, sesungguhnya syeikh kamil itu adalah insan yang jatuh sifat takut orang lain dengannya.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Tiap syeikh yang tidak sampai kepadamu faedah-faedahnya dari balik halangan maka dia bukan syeikh.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Ini tujuh perkara dan tujuh yang bagaimana itu? Jaga-jagailah ia:

Jika engkau melihat seorang yang mendakwa pada dirinya ada hal kesufian sedangkan dia keluar dari perintah syarak maka janganlah engkau mendekatinya.

Jika engkau melihat seorang yang senang hati dengan jabatan dan pengagungan dirinya maka janganlah engkau mendekatinya dan janganlah sekali-kali engkau mengharapkan kejayaannya.

Jika engkau melihat seorang faqir (sufi) kembali kepada dunia, jika engkau mati kelaparan sekalipun jangan engkau dekati dia, jangan cenderung untuk berkawan dengannya kerana berkawan dengannya akan menyebabkan hatimu keras selama empat puluh pagi.

Jika engkau melihat seorang yang merasa kaya dengan ilmunya maka janganlah engkau merasa aman dari kejahilannya.

Jika engkau melihat seorang yang redho dengan dirinya (tertipu dengan diri sendiri) dan senang hati dengan waktunya, maka tuduhlah dia pada agamanya, awaslah benar-benar engkau darinya.

Jika engkau melihat seorang murid sufi [suka] mendengar qasidah dan cenderung untuk berehat-rehat maka janganlah diharapkan kejayaannya.

Jika engkau melihat seorang faqir (sufi) tidak hadir (di sini

terkandung dua makna; pertama tidak hadir dengan jasadnya yakni ponteng, kedua sekadar hadir dengan jasadnya tapi fikirannya sebuk dengan pekerjaan dan dunianya) dari majlis zikir maka ketahuilah bahawa di telah terhalang dari mendapat keberkatan dek kerana kacau bilau fikiran dan pertukaran fahamnya.

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Siapa yang menyeru kepada Allah Tabaroka wa Taala denga seruan yang bukan diserukan oleh Saiyidina wa Maulana Muhammad ﷺ maka dia itu seorang pembid’ah, sedangkan jalan tareqat kita mengikut perjalanan pendahulu, bukan merekacipta sesuatu yang baru.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Tiga perkara jangan kau dakwakan ada padamu, satu perkara jangan kau remehkan wahai si murid penuju Allah sebagai mentauladani junjungan Saiyidina Nabi Nuh عليه السلام dan Saiyidina wa Maulana Muhammad Al-`Arabi ﷺ :

وَلَا أَقُولُ لَكُمْ عِنْدِي خَزَائِنُ اللَّهِ وَلَا أَعْلَمُ الْغَيْبَ وَلَا أَقُولُ إِنِّي مَلَكٌ وَلَا أَقُولُ
لِلَّذِينَ تَزْدَرِي أَعْيُنُكُمْ لَن يُؤْتِيَهُمُ اللَّهُ خَيْرًا اللَّهُ أَعْلَمُ بِمَا فِي أَنْفُسِهِمْ إِنِّي إِذَا لَمِنَ
الظَّالِمِينَ

“Dan aku tidak pernah berkata kepadamu bahawa di sisiku ada perbendaharaan Allah, dan tidaklah aku mendakwa mengetahui perkara-perkara ghaib, dan aku tidak mengatakan bahawa aku ini Malaikat, dan aku juga tidak berkata terhadap orang-orang yang beriman yang kamu pandang hina itu; bahawa Allah tidak akan memberi kebaikan kepada mereka. Allah lebih mengetahui akan apa yang ada di dalam hati mereka. Sesungguhnya aku jika bertindak demikian, nescaya menjadilah aku dari orang-orang yang zalim”

Saiyidina Hud: 31

Mengenai adab-adab duduk bersama, berdamping serta khidmat kepada syeikh yang merupakan mursyid dan murobbimu maka Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Duduk bersama tokoh-tokoh besar



Bekalan Murid Ke Jalan Akhirat

(yaitu para masyaikh kamil termasuk syeikhmu) itu dengan empat sifat:

Mengosongkan diri dari yang bertentangan dengan mereka (jadilah engkau hanya bersama syeikhmu, lupakan yang lain darinya tanpa ada umpatan, adu domba, mencacatkan, mencela, memperkecil dan merendahkan yang lain itu), engkau hanya cenderung, mahabbah dan mengistimewakan mereka (jangan engkau melupakan syeikhmu, jangan menjauhinya... bahkan hendaklah engkau bermesyuarat dengannya dan mendekatkan dirimu kepadanya dengan segala yang disukainya).

Berdamai dirilah (berserah) engkau di hadapan mereka (jangan engkau menipu syeikhmu, jangan kau perdaya dia, hendaklah engkau bersamanya dengan sikap jelas, terus terang tanpa bermain kata, dusta dan berlakon-lakon), hendaklah engkau meninggalkan kesukaanmu dan mengikut kesukaan mereka (engkau mendahulukan syeikh dari dirimu dan dari segala kekasihmu, teman-temanmu, pekerjaanmu dan hartamu).

Mengutamakan perkataan dan perbuatan mereka, tidak mengintip-ngintip apa yang ada dalam hati mereka (jangan engkau bermain-main dengan syeikhmu agar dia tidak menyusahkanmu dan membiarkan engkau belajar dengan cara susah, cara takut dan cara yang melelahkan).

Angkat dan gantungkan hemahmu kepada hemah mereka (mereka itu termasuk syeikh dan murobbimu) dengan syarat muafakat dengan mereka pada perbuatan.

Jika engkau telah melakukan yang demikian itu dan mampu engkau mengerjakannya maka sungguhlah engkau telah menang, telah melepasi halangan dan telah berjaya. Segala puji bagi Allah di awal dan akhirnya.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau duduk bersama ulama maka duduklah bersama mereka dengan ilmu-ilmu naqli dan riwayat-riwayat yang soheh. Di situ sama ada engkau memberi faedah kepada mereka atau engkau mengambil faedah dari mereka,

dan yang demikian itu adalah puncak keberuntungan bersama mereka.

“Jika engkau duduk bersama ahli ibadah dan ahli zuhud maka duduklah bersama mereka di atas hamparan zuhud dan ibadah, maniskanlah bagi mereka apa yang mereka hadapi dengan kesusahan (payah dan pahit), mudahkan bagi mereka apa yang sulit pada mereka menempuhnya (yang tidak mereka fahami dalam perjalanan) dan berilah mereka zauq makrifat yang belum mereka rasa.

“Jika engkau duduk bersama para siddiqin dan masyaikh yang kamil, maka pisahkanlah dirimu dari apa yang engkau ketahui dan janganlah engkau menisbahkan diri kepada amalanmu, nescaya di situ engkau akan mencapai ilmu rahsia yang tersembunyi, perbendaharaan agung, makrifat-makrifat yang besar-besar, segala sirr yang ajaib dan faedah yang amat banyak beserta ganjaran yang tidak terkira. Alhamdulillah atas ihsan dan taufikNya.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Adab al-hadrah tiga perkara:

1. Sentiasa memandang.
2. Dengar dengan teliti.
3. Menetapkan apa yang datang dari hukum.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Empat adab jika ia tiada pada diri faqir yang *mutajarrid* (kerjanya hanya mengkhidmati zawiyah dan dari zawiyah itulah dia beroleh rezeki dan membiayai hidupnya) dan murid sufi yang salik lagi menempuh jalan menuju Allah, maka letakkanlah kedudukannya sama dengan tanah;

1. Sifat merahmati kepada yang kecil (umumnya kepada seluruh masyarakat, khususnya kepada ikhwan dalam tareqat).
2. Sikap menghormati terhadap yang besar (mentakzim seluruh masyaikh yang kamil).
3. Menginsafi diri sendiri (mentarbiyyah, memurnikan dan mujahadah terhadap diri sendiri hingga jadi baik dan berjalan



lurus).

4. Meninggalkan sikap memenangkan nafsu (tidak mentaatinya dan sentiasa menyalahi kehendaknya. Kerana nafsu itu makarnya tak pernah putus dan kerjanya merosakkan amal soleh).

“Empat adab jika ditinggalkan atau kosong dari faqir yang *mutasabbib* (yang punya pekerjaan halal buat menghasilkan pendapatan dari titik peluh dan usaha tangannya) maka janganlah engkau memberi nilai padanya walau dia manusia paling alim di muka bumi sekalipun;

1. Menghindar para penzalim (tidak mendamping dan tidak mahabbah kepada mereka).
2. Mengutamakan ahli Akhirat (tidak cinta ahli dunia, cenderung kepada ahli zikir).
3. Menghiburkan mereka yang kesusahan (kepedulian terhadap mereka yang susah, sakit dan cacat, membantu dan menziarahi mereka).
4. Komitmen menunaikan solat lima waktu berjamaah (kepedulian terhadap solat berjamaah dan tidak meninggalkannya).



Bab 43

ADAB-ADAB PERMINTAAN (DOA) ISTIKHARAH DAN NIAT

Untaian syair yang berikut adalah kata-kata nurani karya Saiyidina As-Syeikh Soleh Al-Jaafari رَضِيَ اللَّهُ عَنْهُ وَأَرْضَاهُ yang mengungkap sambutan dan takzim beliau kepada junjungan Saiyidina wa Maulana Muhammad ﷺ. Penting bagi seorang murid penuju Allah untuk mengetahui dan menghayatinya:

أَهْلًا وَسَهْلًا بِالنَّبِيِّ * خَيْرِ الْأَنَامِ الْعَرَبِيِّ

أَهْلًا وَسَهْلًا بِالْحَبِيبِ * خَيْرِ الْأَنَامِ نِعَمَ الطَّبِيبِ

أَهْلًا وَسَهْلًا بِالرَّسُولِ * بَابِ الرِّضَا بَابِ الْقَبُولِ

وَحُبُّهُ عَيْنُ الْوُضُوءِ * أَهْلًا وَسَهْلًا بِالنَّبِيِّ

Selamat datang hai Nabi

insan terbaik lagi 'Arabi

selamat datang kekasih

insan terbaik tabib terulung



selamat datang hai Rasul

dialah pintu redho dan kabul

cintanya adalah wushul

selamat datang hai Nabi

Kita teruskan dalam siri kali ini dengan bicara pada adab-adab permintaan (doa), istikharah dan niat.

Saiyidina As-Syeikh Al-Kamil As-Syazili -moga Allah meredhoinya dan menyampaikan keredhoannya, dan semoga Allah mengurniai kemanfaatannya kepada kita di dunia dan Akhirat (Allahumma amin)- menyebut tentang adab permintaan dengan katanya: “Perumpamaan segala hamba yang meminta itu tiga:

1. Peminta yang meminta dengan dasar tasdiq dengan tahqiq pada dampingannya.
2. Peminta yang meminta dengan dasar inti tahqiq dengan mengangkat hijab.
3. Peminta yang meminta dengan dasar menjadi naib kepada kesirnaan dirinya (seolah-olah dia berkata inilah permintaan yang disukainya).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau meminta maka mintalah pada Allah. Jika dia memberi maka bersyukurlah padaNya, jika dia menghalang kurnia darimu maka redholah padaNya. Dan janganlah sekali-kali engkau merasa pahit hati (tidak redho), buruk sangka dan dipengaruhi syahwat yang hanya akan mengakibatkan engkau terhalang dari mahabbah, makrifat, redho dan maghfirah, lagi akan terhijab engkau dari Allah dan terhalau engkau dari kedudukan yang tinggi jatuh ke bawah tanpa engkau sedari, atau Dia melemparmu ke batas asfalus safilin (yang terbawah dari segala yang bawah...)” (wal’iyadzu billah, ya Robbi selamatkanlah, tutuplah

kelemahan hamba dan berlemah lembutlah).

Dalam satu peristiwa Saiyidina As-Syeikh Al-Kamil As-Syazili رَضِيَ اللَّهُ عَنْهُ mahu pergi kepada beberapa penguasa zalim kerana hendak membela orang-orang soleh. Maka beliau pun berdoa:

اللَّهُمَّ اجْعَلْ مَشْيِي إِلَيْهِمْ تَوَاضُعًا لَوَجْهِكَ وَانْتِغَاءً لِفَضْلِكَ وَرِضْوَانِكَ وَنُصْرَةً
لَكَ وَرَسُولِكَ صَلَّى اللَّهُ عَلَيْهِ وَسَلَّمَ. وَزَيْنَةً بِزِينَةِ (لِلْفُقَرَاءِ الْمُهَاجِرِينَ الَّذِينَ
أُخْرِجُوا مِنْ دِيَارِهِمْ وَأَمْوَالِهِمْ يَبْتَغُونَ فَضْلًا مِّنَ اللَّهِ وَرِضْوَانًا وَيَنْصُرُونَ اللَّهَ
وَرَسُولَهُ أُولَئِكَ هُمُ الصَّادِقُونَ). وَخَصَّنِي بِالْمَحَبَّةِ وَالْإِيثَارِ وَرَفَعِ الْحَاجَةَ مِنْ
الصُّدُورِ فِي اللَّيْلِ وَالنَّهَارِ وَقِنِي شُحَّ نَفْسِي وَاجْعَلْنِي مِنَ الْمُفْلِحِينَ (رَبَّنَا اغْفِرْ
لَنَا وَلِإِخْوَانِنَا الَّذِينَ سَبَقُونَا بِالْإِيمَانِ وَلَا تَجْعَلْ فِي قُلُوبِنَا غِلًّا لِلَّذِينَ آمَنُوا رَبَّنَا
إِنَّكَ رَؤُوفٌ رَّحِيمٌ).

"Allahumma jadikanlah berjalannya aku kepada mereka sebagai kerendahan hatiku kepada wajahMu, kerana menuntut kurnia dan keredhoanMu dan kerana memenangkanMu dan memenangkan RasulMu ﷺ. Hasilah aku dengan wahyuMu ((bagi orang-orang fakir yang berhijrah, yang telah diusir keluar dari kampung halamannya dan harta bendanya, untuk mencari limpah kurnia dari Allah dan keredhoanNya, serta menolong (agama) Allah dan RasulNya; mereka itulah orang-orang yang benar (imannya dan amalnya). Istimewakanlah aku dengan mahabbah, sikap mendahulukan kepentingan orang lain dan mengangkat hajat dari dalam dada waktu siang dan malam, peliharalah aku dari sifat kikir diriku dan jadikanlah aku dari golongan yang berjaya, (Wahai Tuhan kami! ampunkanlah dosa kami dan saudara-saudara kami yang mendahului kami dalam iman, dan janganlah Engkau jadikan dalam hati kami ada perasaan hasad dengki dan dendam terhadap mereka yang beriman. Wahai Tuhan kami! Sesungguhnya Engkau



amat melimpah belas kasihan dan rahmatMu)."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata:
"Jika engkau mahu bertemu dengan orang bengis atau orang bongkak
maka ucapkanlah:

إِنِّي عُذْتُ بِرَبِّي وَرَبِّكُمْ مِّنْ كُلِّ مُتَكَبِّرٍ لَا يُؤْمِنُ يَوْمَ الْحِسَابِ

*"Sesungguhnya aku berlindung dengan Tuhanku dan Tuhanmu dari
setiap pembongkak yang tidak beriman dengan hari perhitungan."*

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata:
"Yang paling utama untuk diminta oleh seorang hamba kepada Allah
Taala ialah kebaikan-kebaikan dalam agama. Maka dalam segala
kebaikan agama itu terkandung segala kebaikan Akhirat, di dalam
kebaikan Akhirat itu terkandung segala kebaikan dunia dan di dalam
kebaikan dunia itu terzhairlah berbagai keistimewaan awliya'. Adapun
keistimewaan awliya' itu empat sifat:

1. 'Ubudiyyah.
2. Peri tauladan dari ciri-ciri Ar-Rububiyyah (Asma'ullah Al-Husna,
sifat-sifatnya, hadrat-hadratnya dan tugas-tugasnya).
3. Menyelia/menilik kepada perkara yang telah lalu dan yang
akan datang (bagi hamba yang dikurnia ilmu-ilmu laduni oleh
yang Maha Memberi Kurnia).
4. Masuk mengadap Allah setiap hari 70 kali dan keluar sebanyak
itu juga. Maka setiap kali masuk mengadapNya itu dia diberi
aneka perhiasan dari cahaya dan dampungan (perkara ini soal
antara hamba dengan Tuhannya dan bagi si hambaNya itu
apa-apa yang diminta).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata:
"Jika engkau ditakut-takuti oleh sesiapa kalangan manusia atau jin
maka ucapkanlah:

حَسْبُنَا اللَّهُ وَنِعْمَ الْوَكِيلُ

“Cukuplah Allah bagiku, Dialah sebaik-baik pembela.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau mahu meminta hajat dari manusia maka ajukanlah hajat itu kepada Allah sebelum engkau mengajukannya kepada mana-mana manusia.

“Jika Allah menunaikan hajat itu untukmu melalui manusia maka syukurilah Allah Subhanahu wa Taala dan berterima kasihlah kepada manusia. Jika Allah tidak menunaikannya melalui mereka maka hendaklah kamu redho kepada Allah. Janganlah engkau menisbahkan apa-apa kepada seorang pun dari mereka dan janganlah engkau mencerca sesiapa pun melainkan dengan apa yang dicerca oleh Allah. Dan janganlah engkau memuji sesiapa melainkan dengan apa yang dipuji oleh Allah.

“Jika tidak maka tahanlah dirimu (jangan bertindak apa-apa) maka yang demikian itu lebih selamat untuk dirimu dan dirimu lebih gembira untuk menerima redho dari Allah. Beribadallah kepada Allah dengan yakin, nescaya engkau akan diangkat ke darjat-darjat yang tinggi walaupun sedikit amalanmu.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Orang yang paling hina kedudukan di sisi Allah adalah siapa yang menjadikan agamanya sebagai sebab untuk menunaikan hajatnya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau punya suatu hajat dan engkau mahu menunaikan hajatmu itu maka sabitkanlah kepemilikan, kudrat, ilmu, kehendak dan kemahuan kepada Allah Tabaroka wa Taala. Dan jadikanlah kefakiranmu kepadaNya dan hajatmu di sisiNya Subhanahu wa Taala. Aku memberi amaran padamu janganlah penglihatan hatimu menjengah kepada selain Allah, kerana akibatnya engkau akan terhibab dari Allah. Bahkan hendaklah engkau menyerahkan urusanmu kepadaNya Subhanahu wa Taala.



“Dan janganlah engkau gembira, jangan kau sedih, jangan kau takut, jangan kau harap dan jangan kau terhina. Ada pun seorang mukmin itu tidak menghinakan dirinya. Dan ucapkanlah:

بِسْمِ اللَّهِ الَّذِي لَا يَضُرُّ مَعَ اسْمِهِ شَيْءٌ فِي الْأَرْضِ وَلَا فِي السَّمَاءِ وَهُوَ السَّمِيعُ
الْعَلِيمُ

“Dengan nama Allah yang tidak akan mudarat jika bersama namaNya apa-apa yang di bumi atau di langit, dan Dialah Tuhan yang maha Mendengar lagi Maha Alim.”

Mengenai istikharah (meminta pilihan) pula Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Tidak diminta pandangan bagi membuat pilihan melainkan kepada orang yang amanah. Dan berapa ramai hamba yang amanah pada soal harta tidak amanah pada soal kemaluan (harga diri). Boleh jadi ada hamba yang amanah dalam soal kemaluan tapi tidak amanah pada soal harta. Dan boleh jadi ada hamba yang amanah pada soal harta dan amanah pula pada soal kemaluan tapi tidak amanah pada soal agama.

“Orang yang amanah pada agama ialah hamba yang mengambil dari Allah dengan pandangan mata hati yang yakin, dia menilik kepada segala ahwal dan akibat dari segala perkara di dunia dan Akhirat (ciri-ciri ini tidak ada melainkan pada syeikhmu yang merupakan murobbi dan mursyidmu).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara tentang niat dengan katanya: “Hakikat niat ialah tidak menuju kepada selain yang diniatkan ketika masuk kepadanya (jangan engkau menghadirkan apa-apa selain Allah), kesempurnaan niat ialah mengekalkan keadaan ini dengan lengkap (bahawa Allah menjadi teman dalam permusafiran, kerana kita dalam permusafiran menuju Akhirat).

Mengenai hadis sabda junjungan Saiyidina wa Maulana yang merupakan kekasih kita, pensyafaat kita dan wasilah kita ﷺ: “Segala

amalan dikira dari niatnya” telah diperjelaskan oleh Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ dengan katanya: “Sesungguhnya niat itu ada tempatnya, ada waktunya, ada caranya dan ada maknanya.

فَنَسْأَلُكَ يَا اللَّهُ الصَّفَا لِمَحَلَّاتِهَا وَالتَّوْفِيقَ يَا رَبِّي فِي أَوْقَاتِهَا وَالْعِصْمَةَ يَا رَبَّنَا فِي كَيْفِيَّاتِهَا وَالتَّحْقِيقَ يَا ذَا الْجَلَالِ وَالْإِكْرَامِ لِمَعَانِيهَا.

“Maka kami memohon padaMu ya Allah agar Engkau menjadikan kemurnian sebagai tempat niat kami, berikan kami taufik ya Robbi pada waktunya dan penjagaan ya Robbana pada cara-caranya, dan jadikanlah ya Zal Jalali wal Ikrom pada makna niat kami itu ada tahqiqnya.”

وَنَسْأَلُكَ اللَّهُمَّ رَبَّنَا صِحَّةَ الْعَقْدِ وَحُسْنَ الْقَصْدِ وَإِرَادَةَ الْوَجْهِ وَالتَّوَجُّهَ لِلَّهِ تَبَارَكَ وَتَعَالَى وَتَعْظِيمًا لِحَقِّ الرُّبُوبِيَّةِ وَالْإِزَامِ النَّفْسِ وَصَفَ الْعُبُودِيَّةِ.

“Dan kami memohon padaMu Allahumma Robbana bahawa Engkau mengurniai kami akad yang benar, maksud yang baik, berkehendak kepada wajahMu semata-mata dan hanya tawajjuh menujuMu Tabaroka wa Taala, beserta takzim kepada hak rububiyyah dan melazimkan jiwa dengan sifat `ubudiyyah.”

“Maka tempat niat adalah hati, waktunya ketika pembukaan amalan dan caranya keterikatan hati dengan anggota yang lain.

“Adapun makna niat adalah empat perkara:

1. Kasad (tujuan)
2. Azam
3. Kehendak



4. Kemahuan.

... dan kesemua yang empat ini pengertiannya satu.

“Ada dua bentuk niat:

1. Hati tawajjuh beserta sedar yang baik padanya.
2. Ikhlas dalam amalan kerana Allah untuk menuntut ganjaran di sisiNya dan melakukannya kerana mahukan Allah.

Mengenai hadis sabda junjungan Saiyidina wa Maulana yang merupakan kekasih kita, pensyafaat kita dan wasilah kita ﷺ: “Barangsiapa yang baik niatnya nescaya baiklah amalannya” telah diperjelaskan oleh Saiyidina As-Syeikh Al-Kamil As-Syazili رَضِيَ اللَّهُ عَنْهُ dengan katanya: “Baik niat antara engkau dengan Allah itu ialah apabila tawajjuh (menghadapkan) hati dengan takzim kepada Allah dan takzim terhadap perintah Allah dan takzim terhadap apa yang dengannya disuruh Allah.

“Adapun baik niat antara engkau dengan para hambaNya ialah menetapkan arah jiwa untuk menasihati mereka (menginginkan kebaikan buat mereka), disertai dengan menunaikan segala hak [yang wajib ke atasmu], meninggalkan kepentingan peribadi, mengenyepikan halangan serta sabar kerana Allah dan tawakkal kepadaNya.”



Bab 44

AMALAN DAN WIRID-WIRID SEORANG SALIK

Kita teruskan bersama Saiyidina As-Syeikh Soleh Al-Jaafari رَضِيَ اللّٰهُ عَنْهُ وَأَرْضَاهُ dalam untaian kalimat nurani ketika beliau berziarah ke makam dan raudhah Saiyidna wa Maulana Muhammad ﷺ, ini penting [untuk dihayati] oleh seorang kembara dan salik ke jalan Akhirat.

يا روضة في الرضا * والعفو عما قد سلف

فيها النبي المرتضى * أهلا وسهلا بالنبي

قلب أحب المصطفى * يلقي السعادة والصفاء

اذهب إليه ولا تخاف * تلقى المسرة والهدايا

يا سعد من يوما وقف * عند مقام النبي العربي

وانظر يا ولدي بقلبك نوره * وانشق يا مريدي عطوره

نظر النبي لمن حضر * نال الشفاعة والوفا



*Duhai taman dalam redho
yang memaafkan kesalahan lalu
padanya ada junjungan
Baginda Nabi Al-Murtadho
selamat datang hai Nabi
hati yang telah cinta pada Musthofa
beroleh murni dan bahagia
pergilah kepadanya jangan bimbang
kau kan dapati
kesukaan dan kurniaan
bahagia bagi yang berdiri
di sisi makam Nabi `Arobi
pandanglah wahai anakku
dengan hatimu akan cahayanya
hidulah wahai muridku
akan wangiannya
Baginda memandang kepada yang hadir
tercapailah baginya syafaat dan setia*

Kita teruskan dalam siri kali ini dengan membicarakan tentang amalan dan wirid-wirid. Allah jua yang memberi taufik, Dia Maha Menolong, maha menyampaikan kepada sasaran lagi maha mendokong hambaNya. Allahumma amin.

Mengenai amalan, Saiyidina As-Syeikh Al-Kamil As-Syazili رَضِيَ اللَّهُ عَنْهُ berkata: “Segala amalan itu putarannya pada empat perkara:

1. Mahabbah
2. Ikhlas

3. Malu

4. Iman

...maka mahabbah itu engkau perolehi dengan khauf (takut), ikhlas kau capai dengan ilmu, engkau diberi kurnia sifat malu dengan takzim dan berjayanya dirimu beroleh iman dengan sidq (kejujuran).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ meriwayatkan kata-kata berikut dari gurunya Saiyidina As-Syeikh Al-Kamil Abdus Salam bin Masyish رَضِيَ اللَّهُ عَنْهُ وَأَرْضَاهُ bahawa: "Amalan yang paling afdhal adalah empat sesudah empat;

1. Mahabbah kepada Allah
2. Redho dengan keputusan Allah
3. Zuhud terhadap dunia
4. Tawakkal kepada Allah

dan diikuti dengan empat amalan berikut:

1. Mendirikan kefardhuan yang diperintah oleh Allah
2. Menjauhi larangan Allah
3. Diam terhadap apa yang tiada kena mengena dengan dirinya
4. Warak terhadap segala yang melalaikan."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata:

اللَّهُمَّ إِنِّي أَسْأَلُكَ حُسْنَ اللَّبِّ. وَدَوَامَ الذِّكْرِ وَالْفِكْرِ. وَالْإِتِّجَاءَ وَالْإِفْتِقَارَ إِلَيْكَ.
وَالدُّعَاءَ لَكَ وَالِاسْتِجَابَةَ مِنْكَ. وَالثِّقَةَ بِكَ وَالتَّوَكُّلَ عَلَيْكَ. وَالزُّهْدَ الْوَاقِعَ عَلَى
الرَّدِّ الْقَاطِعِ (حقيقة الزهد في جميع الأحوال والمقامات) وَالْمَحَبَّةَ وَالرِّضَا.



Bekalan Murid Ke Jalan Akhirat

“Allahumma sesungguhnya aku bermohon kepadaMu jiwa yang baik, sentiasa zikir dan fikir, berlindung dan sikap kefakiran kepadaMu, berdoa kepadaMu dan mustajab dariMu, percaya denganMu dan bertawakkal kepadaMu, kezuhudan dalam tiap ahwal dan maqam beserta mahabbah dan redho.”

...demikian inilah amalan para siddiqin dalam segala urusan mereka.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ menyebut tentang wirid dengan katanya: “Wirid-wirid golongan siddiqin dan sodiqin ada sembilan: (1) Puasa (2) Solat (3) Zikir (4) Membaca Al-Quran (5) Menjaga anggota badan (6) Mencela nafsu sendiri agar jauh dari syahwat (7) Menyuruh kepada kebaikan (8) Menegah dari yang mungkar di atas empat dasar;

- 9- Zuhud terhadap dunia
- 10- Tawakkal kepada Allah
- 11- Redho dengan ketentuan Allah
- 12- Cinta murni yang berdiri di atas empat tiang;
- 13-Iman
- 14-Tauhid
- 15-Kejujuran niat dan
- 16-Hemah tinggi.

“Adapun insan yang tiada pada dirinya empat ciri ini maka janganlah engkau mengharap kejayaan baginya: (17) Ilmu (18) Warak (19) Takut kepada Allah dan (20) Tawadhu’ kepada hamba Allah.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ meriwayatkan mutiara kata dari mahagurunya Saiyidina As-Syeikh Al-Kamil Abdus Salam bin Masyish رَضِيَ اللَّهُ عَنْهُ وَأَرْضَاهُ yang menyebut: “Ibadah golongan siddiqin dan sodiqin dua puluh: (1) Makanlah kamu (2) Minumlah kamu (3) Berpakaianlah kamu (4) Menungganglah kamu (5) Bernikah kahwinlah kamu (6) Bertempat tinggalah kamu (7) Letaklah tiap sesuatu di mana

tempat yang diperintahkan Allah dan (8) Janganlah kamu melampau (9) Beribadatlah kepada Allah (10) Syukurilah Allah (11) Hendaklah kamu menahan diri dari menyakiti (12) Hendaklah kamu menanggung kesakitan (13) Bersikap murah hati dan berbudi dengan apa yang ada... sesungguhnya ketiga belas perkara ini adalah satu perduaa akal.

Adapun seperduanya lagi (14) Menunaikan kefardhuan (15) Menjauhi yang haram (16) Redho dengan ketentuan Tuhan (17) Sesungguhnya ibadah kepada Allah ialah tafakkur tentang Allah (18) Percaya dengan agama Allah adalah asas ibadah dan (19) Zuhud terhadap dunia (20) Kepala ibadah adalah tawakkal kepada Allah.

Maka yang demikian inilah ibadah golongan yang sehat di kalangan mukminin. Jika kamu sakit maka mintalah penawar kesembuhan dan ruqyah dari para ulama, pilihlah dari kalangan ulama itu ahli taqwa yang memberi petunjuk lagi mereka itu bertawakkal kepada Allah Tabaroka wa Taala.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Aku telah bertanya mahaguruku Saiyidina As-Syeikh Al-Kamil Abdus Salam Ibnu Masyish رَضِيَ اللَّهُ عَنْهُ وَأَرْضَاهُ tentang wirid golongan muhaqqiqin (wali-wali besar penyandang maqam-maqam yang tinggi), maka kata beliau: “Hendaklah engkau menjatuhkan hawa nafsu dan mencintai Tuhan (ini sulit dilakukan, prosesnya panjang dan mujahadahnya banyak lagi besar, namun ia mudah bagi yang dikehendaki dan dipilih Allah). Mahabbah itu enggan diperuntukkan melainkan kepada yang dicintainya semata (jika memang engkau telah sampai kepada mahabbah maka itulah dia).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Dihikayatkan bahawa ada seorang lelaki meminta kepada mahagurunya Saiyidina As-Syeikh Al-Kamil Abdus Salam Ibnu Masyish رَضِيَ اللَّهُ عَنْهُ وَأَرْضَاهُ: “Tuan aturkanlah kepada saya wazhifah dan wirid (ertinya dia meminta agar disusun untuknya amalan wirid dan wazhifah tertentu sepanjang siang dan malam), maka marahlah mahaguru kepada lelaki itu seraya berkata: “Apakah aku ini seorang rasul untuk mewajibkan amalan itu ini?! (Lihatlah keagungan masyaikh yang besar-besar; pada peringkat



Bekalan Murid Ke Jalan Akhirat

mula diherdiknya si murid. Saya percaya bahawa yang meminta adalah Saiyidina As-Syazili waktu beliau di peringkat permulaannya. Wallahu a'lam. Kerana jawapan si mahaguru merupakan penjelasan yang lengkap dan ringkas bagi Tareqat As-Syaziliyyah).

“Adapun segala yang fardhu itu sudah maklum dan segala maksiat pula sudah dikenal. Lalu hendaklah engkau menjaga segala yang fardhu, menolak segala yang maksiat, dan jagalah hatimu dari kehendak kepada dunia, dari cinta wanita, dari cinta kemegahan, dari mengutamakan syahwat. Dan hendaklah engkau merasa cukup dengan dari itu semua dengan apa yang telah dibahagikan Allah Taala kepadamu.

“Jika engkau beroleh kurniaan redho maka syukurilah Allah, jika engkau ditimpa kemurkaan maka sabarlah kepadaNya. Adapun cinta kepada Allah adalah paksi yang berkitar mengelilinginya segala kebaikan dan ia merupakan asal dari berbagai kemuliaan.

“Adapun benteng bagi yang demikian itu empat:

1. Warak yang tulus
2. Niat yang baik
3. Amal yang ikhlas
4. Disertai ilmu.

“Adapun himpunan yang disebutkan tadi tidak akan sempurna melainkan dengan berdamping kepada syeikh yang jaya lagi sempurna, sampai lagi menyampaikan.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ menghidayatkan tentang mahagurunya Saiyidina As-Syeikh Al-Kamil Abdus Salam Ibnu Masyish رَضِيَ اللَّهُ عَنْهُ وَأَرْضَاهُ bahawa dia telah mendengar mahagurunya itu berkata kepada seorang lelaki yang meminta izin untuk bermujahadah melawan nafsu. Maka si mahaguru menjawabnya dengan firman Allah:

لَا يَسْتَأْذِنُكَ الَّذِينَ يُؤْمِنُونَ بِاللَّهِ وَالْيَوْمِ الْآخِرِ أَنْ يُجَاهِدُوا بِأَمْوَالِهِمْ وَأَنْفُسِهِمْ
وَاللَّهُ عَلِيمٌ بِالْمُتَّقِينَ

“Orang-orang yang beriman kepada Allah dan hari Akhirat, tidak akan meminta izin kepadamu untuk (tidak turut) berjihad dengan harta benda dan jiwa mereka. Dan (ingatlah) Allah Maha Mengetahui akan orang-orang yang bertaqwa” **At-Taubah: 44**

Subhanallah, Maha Suci Allah yang Maha Tinggi lagi Maha Agung ; dalam soal jihad melawan nafsu dan mengambil amalan tareqat silakanlah bermula dan tawakkallah kepada Allah. Dalam soal ini tak perlu bagimu untuk meminta izin dari sesiapa, namun tentunya kamu mengambil izin terlebih dahulu untuk mengamalkan bacaan wirid-wirid dari syeikhmu.

Dan renunglah pula lawan dari permintaan tadi; yaitu orang yang masih berfikir-fikir untuk berjuang melawan nafsu sendiri, lihatlah apa kata ayat Al-Quran kepadanya:

إِنَّمَا يَسْتَأْذِنُكَ الَّذِينَ لَا يُؤْمِنُونَ بِاللَّهِ وَالْيَوْمِ الْآخِرِ وَارْتَابَتْ قُلُوبُهُمْ فَهُمْ فِي رَيْبِهِمْ
يَتَرَدَّدُونَ

“Sesungguhnya yang akan meminta izin kepadamu (untuk tidak berjihad) hanyalah orang-orang yang tidak beriman kepada Allah dan hari Akhirat, dan yang hati mereka (sangat) ragu-ragu. Oleh itu mereka sentiasa bingung teragak-agak dalam keraguannya” **At-Taubah: 45**



Bab 45

AHLI IBADAH DAN AHLI ZUHUD

Alangkah indah nya sikap yang dipamerkan oleh junjungan kita para sahabat رَضَوُا اللّٰهَ عَلَيْهِمْ أَجْمَعِينَ; mereka berdiri tegak melihat junjungan Saiyidina wa Maulana Muhammad Rasulullah ﷺ. Maka bersabdalah kepada mereka junjungan Baginda Nabi kita ﷺ yang merupakan penghulu ahli tawadhu' عَلَيْهِ السَّلَام: “Janganlah kamu sekalian bangun berdiri ketika melihatku,” waktu itu Saiyidina Hassan bin Tsabit turut hadir bersama para sahabat yang berdiri dan beliau merupakan penyair hadrat Baginda Nabi عَلَيْهِ السَّلَام وَتَحِيَّهٖ, beliau juga dipuji oleh Ruhul Quds Saiyidina Jibril عَلَيْهِ السَّلَام. Maka berkatalah Saiyidina Hassan: Ya Saiyidi ya Rasulullah ﷺ وَسَلَّم, apakah tuan mengizinkan hamba untuk berbicara? Maka sesudah beroleh izin dari hadrat junjungan Baginda Nabi ﷺ beliau pun berkata:

قِيَامِي لِلْعَزِيزِ عَلَيَّ فَرَضٌ * وَتَرَكُ الْفَرَضِ مَا هُوَ مُسْتَقِيمٌ
عَجِبْتُ لِمَنْ لَهُ عَقْلٌ وَفَهْمٌ * يَرَى هَذَا الْجَمَالَ فَلَا يَقُومُ

Berdiri menyambut kedatangan yang mulia

adalah fardhu atas diriku

dan meninggalkan yang fardhu itu

bukanlah satu jalan yang lurus

takjubnya aku

kepada orang berakal faham

tika melihat keindahan ini

dia tidak bangun berdiri

Kita sempurnakan lagi dalam siri ini dengan bicara tentang golongan ahli ibadah dan ahli zuhud, juga tentang berbagai ketaatan dan tentang kemuliaan yang ianya milik Allah Subhanahu wa Taala dan junjungan Saiyidina wa Maulana Rasulullah ﷺ.

Saiyidina As-Syeikh As-Syazili berkata mengenai ahli ibadah dan ahli zuhud: "Ahli ibadah telah membina urusan mereka di atas sepuluh dasar: (1) Puasa (2) Solat (3) Zikir dan tilawah Al-Quranul Karim (4) Doa (5) Istighfar (6) Tadharu' (memohon dengan rendah diri) (7) Tangisan (8) Mengasing diri dari keramaian manusia (9) Menghasilkan makan minum dari sumber halal dan (10) Hamparan mereka adalah zikir (sentiasa dalam keadaan zikir).

"Adapun ahli zuhud melebihi ahli ibadah dengan empat sifat: (1) Zuhud terhadap dunia secara umumnya dan zuhud secara khusus terhadap manusia (2) Singkapan ghaib alam malakut (mereka punya muroqobah dan dikurniakan kasyaf yang bersifat tinggi lagi robbani, bukan kasyaf yang rendah dan syaitani yaitu kasyaf ahli sihir dan yang seumpamanya) (3) Mempunyai makrifat tentang ahwal dan peningkatan para rijal di maqam-maqam rohani (4) Hamparan mereka adalah fikir (sentiasa dalam keadaan fikir dan tafakkur terhadap apa yang dapat memberi manfaat kepada umat dan murid-murid mereka).

"Adapun para awliya mereka punya tingkatan dan martabat tertentu. Ada kalangan mereka yang; (1) Diberi keluasan ilmu dan makrifat, (2) Nur dan mahabbah, (3) Tauhid dan yakin (4) Kasyaf (singkapan) ghaib dan (5) Kemantapan di dalamnya, (6) Tahqiq dengan Allah yang Maha Kaya Subhanahu wa Taala dan (7) Tahqiq dengan kesan-kesan anwar al-baqa' (cahaya abadi). Adapun hamparan mereka adalah al-mahabbah al-far'iyah yaitu mahabbah yang cabang (barang siapa merasa zauqnya dia tahu dan siapa yang belum merasa dia tidak tahu. Maka sentiasalah -seorang murid sufi-



Bekalan Murid Ke Jalan Akhirat

merasakan kehadiran mahabbah dan takzim terhadap syeikhnya dan ahli sanadnya رَضِيَ اللَّهُ عَنْهُ وَأَرْضَاهُمْ أَجْمَعِينَ, terutamanya penghulu, pemimpin dan imam mereka; penghulu kewujudan dan penyebab kepada segala yang diadakan Saiyidina wa Maulana Muhammad ﷺ).

“Adapun golongan siddiqin; pada tahap mula mereka menjalani lima ahwal: (1) Lipatan wujud dan lipatan dari sirr mereka (2) Tersingkap bagi roh mereka hakikat agama (3) Muroqobah hati (4) Meraikan akal (5) Menjaga jiwa.

“Adapun lima ahwal di tahap akhir mereka pula: (1) Tahqiq pada mahabbah (2) Menahan diri (3) Diam (4) Ketetapan dalam al-khullah (sifat) (5) Bersifat baqa’ (kekal). Adapun hamparan mereka adalah mahabbah yang asli (mereka sentiasa dalam muroqobah, dalam musyahadah dan dalam ‘iyan dengan Allah Tuhan kita yang Maha Benar lagi Maha Terang Subhanahu wa Taala.

“Adapun faedah perincian ialah yang diikuti (yaitu syeikh) memberi kepada setiap pengikutnya (murid-muridnya) masing-masing dengan kadar hal dan maqamnya sesuai dengan kedudukan yang Allah letakkan dia di situ. (Lihatlah betapa besarnya makrifat syeikh dan amanahnya yang khas yang ditanggung oleh beliau kemudian beliau memberinya seperti yang diperintahkan keatasnya)

وَتَحْسَبُونَهُ هَيِّنًا وَهُوَ عِنْدَ اللَّهِ عَظِيمٌ

“kamu menyangkanya perkara kecil, pada hal ia di sisi Allah adalah besar” **An-Nur: 15**

Mengenai amal ketaatan Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Janganlah engkau melewati ketaatan dari satu waktu ke waktu yang lain, nanti kamu akan dihukum dengan keluputannya dan luput ketaatan yang lain atau yang seumpamanya darimu sebagai balasan atas apa yang engkau sia-sia dan lalaikan di waktu itu. Sesungguhnya tiap waktu itu ada sahamnya dalam ubudiyyah

yang dituntut oleh Allah Subhanahu wa Taala darimu atas hukum rububiyah. (Misalnya orang yang meninggalkan solat di waktunya, atau melewatkan solat pada bukan waktunya, atau orang yang tidak membaca wirid dan hizibnya). Maka fahamilah duhai murid

وَلَا تَكُنْ مِّنَ الْغَافِلِينَ

“dan janganlah engkau menjadi dari orang-orang yang lalai” **Al-A'raaf: 205**

“Aku berkata dalam hati: Sesungguhnya Saiyidina Abu Bakar As-Siddiq رَضِيَ اللَّهُ عَنْهُ وَأَرْضَاهُ melewatkan solat witrnya hingga ke akhir malam. Lalu ada suara datang dalam mimpiku berkata: “Yang demikian itu adalah adat yang berlaku dan sunnah yang sabit lagi dilazimkan oleh Allah ke atas beliau serta berterusan menjaganya. Maka di mana kedudukanmu pada amalan itu sedangkan kecenderunganmu pada berehat-rehat dan bersuka-suka dengan syahwat... alangkah jauhnya... lagi engkau suka masuk kepada berbagai kesalahan dan ghaflah dari musyahadah... alangkah jauhnya.

“Aku pun berkata dalam hati: “Lalu apakah itu tadbir atau penolakan?,” suara itu menjawab: “Bahkan itu tadbir yang menuntut adab dan ingatan dari apa yang dilalaikan. Ia adalah wasiat kepadamu dan wasiat darimu kepada para hambaNya yang soleh. Maka berilah perhatian terhadapnya dan janganlah engkau menjadi kalangan mereka yang lalai

وَإِنْ كُنْتَ مِنْ قَبْلِهِ لَمِنَ الْغَافِلِينَ

“padahal engkau sebelum datangnyanya wahyu itu, adalah dari orang-orang yang tidak menyedari akan halnya” **Saiyidina Yusuf: 3**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Pernah dikatakan kepadaku...(di sini beliau tidak menjelaskan bagaimana dan di mana... yang penting ambillah isyarat dan ibaratnya, tinggalkanlah perincian nescaya engkau selamat kerana itu semua



Bekalan Murid Ke Jalan Akhirat

perkara-perkara zauqi dan `irfani. Semoga Allah membela kita semua): ‘Faedah apa yang kau dapat dari mentaatiKu? Dan apakah faedahnya engkau menderhakaiKu?’” aku menjawab: “Faedah yang hamba dapat dari ketaatan: ilmu yang bertambah, cahaya yang menembusi dan mahabbah. Faedah yang hamba dapat dari kederhakaan: dukacita, kesedihan, takut dan harapan.”

Dalam satu perkhabaran Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Barangsiapa mentaatiku pada segalanya aku akan mentaatinya pada segalanya” beliau mengujar bahawa seolah-olahnya Dia berkata: “Barangsiapa mentaatiku pada segalanya dengan dia meninggalkan segalanya nescaya aku mentaatinya pada segalanya dengan aku bertajalli untuknya pada segalanya hingga dia melihat aku seolah-olah aku adalah segala-galanya.” Ini adalah ketaatan dan musyahadah pada hak golongan awam di kalangan solihin.

“Adapun bagi golongan khawas kalangan siddiqin maka ketaatan mereka ialah dengan kehampaan terhadap segalanya. Kemudian penerimaan terhadap segalanya kerana baik kehendak Tuhan mereka pada segalanya. Maka seolah-olah Dia berkata: “Barangsiapa mentaatiku dengan segalanya dengan penerimaannya atas segalanya kerana baik kehendakku pada segalanya nescaya aku mentaatinya pada segalanya dengan aku bertajalli untuknya pada segalanya sehingga dia melihatku terlebih dekat dengannya dari segalanya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Hendaklah engkau mengambil lima penyucian pada perkataan, dan lima penyucian pada perbuatan, lagi hendaklah engkau berlepas diri dari daya dan upaya pada tiap hal. Lagi hendaklah engkau selami dengan akalmu ke dalam segala makna yang ada di dalam hati. Dan keluarlah dari segala makna itu dari dari akalmu kepada Tuhanmu Subhanahu wa Taala. (1) Jagalah Allah nescaya Allah menjagamu (2) Jagalah Allah nescaya engkau mendapatiNya di hadapanmu dan (3) Beribadahlah kepada Allah serta

“jadilah engkau dari kalangan mereka yang bersyukur” **Al-A'raaf: 144**

“Adapun lima penyucian pada perkataan ialah:

سُبْحَانَ اللَّهِ وَالْحَمْدُ لِلَّهِ وَلَا إِلَهَ إِلَّا اللَّهُ وَاللَّهُ أَكْبَرُ وَلَا حَوْلَ وَلَا قُوَّةَ إِلَّا بِاللَّهِ.

“Maha suci Allah, segala puji bagi Allah, tiada Tuhan melainkan Allah, Allah Maha Besar, tiada daya dan upaya melainkan dengan izin Allah.”

“Adapun lima penyucian pada perbuatan ialah solat lima waktu yang difardukan. Adapun engkau berlepas diri dari daya dan upaya ialah perkataanmu:

لَا حَوْلَ وَلَا قُوَّةَ إِلَّا بِاللَّهِ.

(Lihatlah di sini betapa agung dan halusny diskripsi sufi dan resepi didikannya agar engkau -duhai murid- beroleh kemuliaan sifat `ubudiyyah kepada Allah yang Maha Satu lagi Maha Esa, dan lagi moga engkau beroleh pemintasan jarak dan maqam-maqam jiwa).

يَا أَيَّتُهَا النَّفْسُ الْمُطْمَئِنَّةُ ... ارْجِعِي إِلَىٰ رَبِّكِ رَاضِيَةً مَّرْضِيَّةً ... فَادْخُلِي فِي عِبَادِي ... وَادْخُلِي جَنَّاتِي.

“Wahai orang yang mempunyai jiwa yang sentiasa tenang tetap dengan kepercayaan dan bawaan baiknya!. Kembalilah kepada Tuhanmu dengan keadaan engkau berpuas hati (dengan segala nikmat yang diberikan) lagi diredhoi (di sisi Tuhanmu)!. Serta masuklah engkau dalam kumpulan hamba-hambaKu yang berbahagia. Dan masuklah ke dalam SyurgaKu!” **Al-Fajr: 27-30**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ membicarakan



tentang kemuliaan seperti yang tersebut dalam firman Allah Taala:

وَلِلَّهِ الْعِزَّةُ وَلِرَسُولِهِ وَلِلْمُؤْمِنِينَ.

“... dan bagi Allah jumlah kemuliaan dan kekuatan itu, dan bagi RasulNya serta bagi orang-orang yang beriman” **Al-Munafiqun: 8**

“Maka kemuliaan bagi orang mukmin itu ialah bilamana Allah menahannya dari ibadah kepada hawa nafsunya, kepada syaitan dan dunia, atau kepada apa-apa yang ada di alam ghaib dan nyata, serta alam dunia dan Akhirat. Ada pun orang munafik tidak tahu kemuliaan melainkan dengan sebab dan ibadahnya itu kepada tuhan-tuhan lain

أَلِلَّهِ مَعَ اللَّهِ تَعَالَى اللَّهُ عَمَّا يُشْرِكُونَ

“Adakah sebarang tuhan yang lain bersama-sama Allah? Maha Tinggilah keadaan Allah dari apa yang mereka sekutukan denganNya” **An-Naml: 63**

أَيُّشْرِكُونَ مَا لَا يَخْلُقُ شَيْئًا وَهُمْ يُخْلَقُونَ. وَلَا يَسْتَطِيعُونَ لَهُمْ نَصْرًا وَلَا أَنْفُسُهُمْ يَنْصُرُونَ. وَإِنْ تَدْعُوهُمْ إِلَى الْهُدَى لَا يَتَّبِعُكُمْ سَوَاءَ عَلَيْكُمْ أَدَعَوْتُمُوهُمْ أَمْ أَنْتُمْ صَامِتُونَ.

“Patutkah mereka sekutukan Allah dengan benda-benda yang tidak dapat menciptakan sesuatu pun, sedang benda-benda itu sendiri diciptakan?!. Dan benda-benda itu tidak dapat menolong mereka, dan tidak juga dapat menolong dirinya sendiri. Dan jika kamu (hai kaum musyrik) menyeru benda-benda itu untuk memperoleh petunjuk (daripadanya), mereka tidak dapat menurut (menyampaikan hajat) kamu; sama sahaja bagi kamu, sama ada kamu menyerunya atau mendiamkan diri.” **Al-A'raaf: 191-193**

(Inilah kefahaman para junjungan masyaikh sufi -moga Allah

meredhoi mereka dan mencapaikan keredhoan buat mereka-, fahaman ini bukan untuk kaum mungkirin yang degil dan yang menentang). Maka fahamilah, moga engkau berjaya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ menjelaskan perkataannya: “Barang siapa yang mahukan kemuliaan dunia Akhirat silakanlah masuk madrasah dan tareqat kami, dalam dua hari dia sudah tahqiq (merealisasikan) dengan dua kemuliaan tadi,” maka beliau ditanya orang: “Bagaimanakah itu?”

“Maka jawab beliau -moga Allah meredhoinya dan mencapaikan keredhoan buatnya- : “(1) Pisahkan segala berhala dari hatimu dan (2) Rehatkan badanmu dari dunia

إِنَّ الَّذِينَ قَالُوا رَبُّنَا اللَّهُ ثُمَّ اسْتَفَامُوا فَلَا خَوْفَ عَلَيْهِمْ وَلَا هُمْ يَحْزَنُونَ ..
أُولَئِكَ أَصْحَابُ الْجَنَّةِ خَالِدِينَ فِيهَا جَزَاءً بِمَا كَانُوا يَعْمَلُونَ.

“Sesungguhnya mereka yang menegaskan keyakinannya dengan berkata: "Tuhan Kami adalah Allah", kemudian mereka tetap teguh di atas jalan yang betul (dengan pengkauan iman dan tauhidnya itu), maka tidak ada kebimbangan (dari sesuatu yang tidak baik) terhadap mereka, dan mereka pula tidak akan berdukacita.” **Al-Ahqaaf: 13**

... kemudian jadilah engkau menurut apa kehendakmu.”

(Inilah tujuan manusia berakal, tujuan insan muslim yang menyerah diri, tujuan insan mukmin yang dahagakan hakikat dan tujuan murid sejati dalam tawajjuh dan `ubudiyyahnya kepada Allah. Ini takkan sempurna melainkan dengan mendamping diri dan khidmat kepada syeikh yang memberi nasihat lagi menang dan jaya, sempurna, sampai dan menyampaikan... Kamu dapat mencarinya dengan jalan istikharah dan konsultasi, bukan melalui populariti, iklan dan media. Kerana kebanyakan masyaikh yang kamil tumbuh, membesar dan menjalankan tarbiyyahnya di tanah bumi sembunyi diri, melainkan syeikh yang memang dimasyhurkan Allah lalu diperkenalkan namanya



Bekalan Murid Ke Jalan Akhirat
dan dizahirkan dirinya).

إِنْ أُرِيدُ إِلَّا الْإِصْلَاحَ مَا اسْتَطَعْتُ وَمَا تَوْفِيقِي إِلَّا بِاللَّهِ عَلَيْهِ تَوَكَّلْتُ وَإِلَيْهِ
أُنِيبُ.

“...Aku hanya bertujuan hendak memperbaiki sedaya upayaku; dan tiadalah aku akan beroleh taufik untuk menjayakannya melainkan dengan pertolongan Allah. Kepada Allah jualah aku berserah diri dan kepadaNya lah aku kembali” Saiyidina Hud: 88

“Sesungguhnya Allah takkan membiarkanmu. Jika sesuatu dari dunia datang kepadamu maka janganlah engkau memandangnya dengan mata yang berkehendak. Jangan engkau mensahabatinya dengan rasa gerun. Jangan engkau duduk bersamanya melainkan dengan kewajiban ilmu pada membelanjakan dan memegangnya.

“Jika pada satu hari engkau meminta sesuatu dari yang demikian itu, maka saksikanlah apa yang dituntut Allah kepadamu dalam apa yang engkau minta kepadaNya, sesungguhnya ada tuntutan ke atasmu dengan permintaan itu.

“Jika keluar kepadamu permintaan dariNya dari pintu redho maka masuklah dan janganlah menggantungkan harapan hatimu untuk memperolehinya. Jika itu tidak boleh tidak maka sesungguhnya engkau tidak tahu apakah itu berhubung denganNya atau tidak? Jika berhubung denganNya maka engkau tidak mengetahui apakah ia untukmu atau untuk orang lain? Jika ia untukmu maka engkau tidak mengetahui apakah padanya kebaikan untukmu atau kejahatan? Jika untuk orang lain maka engkau tidak mengetahui apakah orang lain itu kekasihmu atau musuhmu?

“Secara keseluruhannya [marilah ku simpulkan] bagaimana harusnya hati itu boleh tenang terhadap sesuatu yang diwahamkan (dari segala sangkaan dan ilusi) yang tergambar dalam segala rupa yang disebutkan tadi bahkan lebih banyak dari itu.

“Maka mintalah ia dalam keadaan engkau bergantung kepada Allah dan memandang kepadaNya. Jika engkau memperolehinya maka tunaikanlah kesyukuran. Jika tidak maka redho dan sabarlah, bahkan jika memuji-muji Allah itu lebih indah. Kerana sesungguhnya Allah apabila tidak memberi kepadamu bukanlah bererti kebakhilan, namun tidak dia menahan pemberiannya darimu itu dengan memandang kepadamu. Maka jika Dia menahan pemberiannya darimu itulah sebenarnya dia telah memberi kepadamu. Akan tetapi tidaklah kehilangan pemberian dalam tegahan melainkan golongan siddiqin.

Jika permintaan kepada Allah itu keluar kepadamu dari pintu murka dengan dalil bersalahan dia dengan ilmu atau hampir-hampir begitu maka hendaklah engkau berlindung diri kepada Allah dan larilah kepadaNya sehingga Dialah nanti yang akan melepaskanmu.

اسْتَعِينُوا بِاللَّهِ وَاصْبِرُوا إِنَّ الْأَرْضَ لِلَّهِ يُورِثُهَا مَنْ يَشَاءُ مِنْ عِبَادِهِ وَالْعَاقِبَةُ
لِلْمُتَّقِينَ.

"Mintalah pertolongan kepada Allah dan bersabarlah, sesungguhnya bumi ini kepunyaan Allah, diwariskannya kepada sesiapa yang dikehendakiNya dari hamba-hambaNya; dan kesudahan yang baik adalah bagi orang-orang yang bertaqwa". Al-A'raaf: 128

Demikian inilah adab dan ilmu *munazalaat al-qulub* juga segala persinggahan jiwa dan *fiqh al-qulub*. Allah Subhanahu wa Taala jua yang Maha Tinggi lagi maha berharga. Dialah Tuhan yang lebih tahu, lebih sempurna, lebih afdhal dan lebih baik.



Bab 46

TAWADHUK, TAQWA, WARAK DAN IKHLAS

Ada orang berkata -dan semoga dia diredhoi Allah-: “Ini adalah sebahagian dari ahwal murid sejati dengan syeikhnya yang murobbi untuk kemaslahatannya dalam pelajaran, kejayaan, kefahaman, peningkatan dan kemenangannya. Ambillah kata-kata ini seadanya; jangan engkau membangkang dan jangan berkata susah.

إِذَا حَلَّ ذِكْرُكُمْ فِي خَاطِرِي * فَرَشْتُ خُدُودِي مَكَانَ الثَّرَابِ

وَأَقْعَدَنِي الذُّلَّ فِي بَابِكُمْ * فُعُودُ الْأَسَارَى لِضَرْبِ الرَّقَابِ

وَبَحْتُ بِالْغَرَامِ عَسَى يَجِدَنِي * عِنْدَ الَّذِي يَجُودُ بِالْأَفْرَاحِ

مِنْ أَهْلِ الْعَفْوِ وَالسَّاحِ

Tika ingatan padamu mendarat di hati

pipiku ini... ku hampar di tanah

rasa hina mendudukkan aku di pintumu

seperti tawanan yang menunggu hukum pancung

*perasaan cinta pun ku luahkan
mana kan tahu disambut nanti
oleh sang budiman yang memberi kegembiraan
merekalah ahli kemaafan dan kelapangan*

Bagi siapa yang mahu membantah atau mencabar para junjungan masyaikh sufi Islami yang Sunni yang berbagai masyrab, madrasah, tareqat dan namanya maka hendaklah si pencabar terlebih dahulu memakaikan dirinya dengan adab-adab yang akan disebutkan sebentar lagi kemudian dipersilakanlah bercakap... janji kami adalah sedia untuk mendengar bicara mereka dan orang yang seperti mereka.

Wahai si mungkir, si penentang, wahai si jahil... di sana ada enam adab zahir dan sepuluh adab batin kalau mampu kamu melakukannya maka silakanlah berbicara dan kami akan diam.

Tapi jika kamu tidak mampu mengerjakannya maka diamlah dan rehatkanlah manusia dari melayan karenahmu, tinggalkan kami dengan hal kami kerana kami dah jenuh denganmu dan dengan mereka yang sepertimu.

Sesungguhnya para junjungan masyaikh sufi telah fana diri mereka dalam mempraktis segala adab tadi dan adab-adab lain yang teramat banyaknya. Lalu segala puji bagi Allah yang telah berbudi kepada ahli adab dan menjadikan mereka sebagai ahliNya dan golongan istimewa di sisiNya

سُبْحَانَهُ وَتَعَالَى عَمَّا يَقُولُونَ عُلُوًّا كَبِيرًا

“Maha Sucilah Allah dan tertinggillah Dia setinggi-tingginya, jauh dari apa yang mereka katakan itu” Al-Isra’: 43

Maka akhlak zahir yang luarannya: (1) Tidak membunuh (2) Tidak berzina (3) Tidak minum arak (4) Tidak Makan haram (5) Tidak



mengumpat (6) Tidak mengadu domba.

Ada pun akhlak batin yang dalamannya ialah: (1) Tidak hasad (2) Tidak dendam (3) Tidak ghurur (4) Tidak riya' (5) Tidak `ujub (6) Tidak sombong (7) Tidak bakhil (8) Tidak munafik (9) Tidak cinta kemegahan, pangkat, kedudukan dan pekerjaan (10) Tidak cinta kuasa dan kemasyhuran.

Kita sambung lagi bicara pada siri kali ini dengan topik tawadhu', taqwa, warak, ikhlas dan yakin.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai tawadhu': "Tertempalah dengan kebahagiaan seorang insan yang mengenal kebenaran lalu tawadhu' dia kepada ahli kebenaran walau apa pun amalannya. Terpalitlah dengan kecelakaan seorang insan yang degil terhadap kebenaran dan menyombong terhadap ahlinya walau apa pun amalannya."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: "Bersama teman-temanku aku telah pergi ke perkebunan di kota Tunis kemudian kembali ke kota. Tika itu kami berkenderaan keldai. Apabila sudah sampai dekat dengan kota teman-teman semuanya turun sedangkan tanah basah berlecek (kerana baru lepas hujan). Mereka berkata kepadaku: Ya Tuan kami, turunlah di sini," aku bertanya: "Mengapa pula?" kata mereka: "Ini kota, malu kita masuk kepadanya dengan menunggang keldai." Maka aku pun mengangkat kakiku untuk berbuat seperti mereka, lalu aku diseru oleh suara: "Wahai Ali! Sesungguhnya Allah tidak mengazam kesenangan (kenderaan) dan disertai dengan tawadhu', tetapi Allah mengazab kesenangan (kenderaan) yang disertai dengan sombong."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai taqwa: "Jadikanlah taqwa sebagai tanah air (sebagai tanah bumi yang engkau berjalan di atasnya, sebagai rumah tempat tinggalmu di dalamnya, sebagai negara yang engkau sebagai warga rakyatnya) lalu dengan itu tiada mudarat ke atasmu pujian diri dan manusia selagi engkau tidak (1) Berkeras melakukan dosa (2) Redho dengan keaiban

(3) Gugur takutmu di sisi ghaib.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai warak: “Jalan dan tareqat ini bukanlah dengan perkara-perkara berikut: (1) Hidup secara rahib (mengasing diri dari masyarakat manusia) (2) Hanya makan gandum dan makanan paling murah (3) Meninggalkan pertukangan tangan dan pekerjaan (tidak berkerja, tidak belajar dan tidak berilmu).

“Adapun sesungguhnya jalan dan tareqat ini ialah dengan: (1) Sabar dan (2) Yakin dalam hidayah

وَجَعَلْنَا مِنْهُمْ أَئِمَّةً يَهْدُونَ بِأَمْرِنَا لَمَّا صَبَرُوا وَكَانُوا بِآيَاتِنَا يُوقِنُونَ. إِنَّ رَبَّكَ هُوَ
يَفْصِلُ بَيْنَهُم يَوْمَ الْقِيَامَةِ فِيمَا كَانُوا فِيهِ يَخْتَلِفُونَ.

“Dan Kami jadikan dari kalangan mereka beberapa pemimpin, yang membimbing kaum masing-masing kepada hukum ugama kami, selama mereka bersikap sabar (dalam menjalankan tugas itu) serta mereka tetap yakin akan ayat-ayat keterangan Kami. (Pertentangan di antara satu golongan dengan yang lain itu) Sesungguhnya Tuhanmu sahajalah yang akan memutuskan hukumNya di antara mereka pada hari Kiamat, mengenai apa yang mereka berselisihan padanya.” As-Sajadah: 24-25

“Dan lagi jalan ini (jalan menuju Allah) adalah jalan kemuliaan untuk insan mulia yang ada padanya lima ciri: (1) Sabar (2) Taqwa (3) Warak (4) Yakin (5) Makrifat.

“Sabar bila disakiti, taqwa dengan tidak menyakiti, warak pada apa yang masuk dan keluar dari sini (Syeikh menyebut kata-kata ini sambil mengisyaratkan kepada mulutnya). Dan di dalam hati tidak masuk kepadanya melainkan apa yang diredhoi oleh Allah dan RasulNya ﷺ. Yakin pada rezeki, dan makrifatnya pada Allah سبحانه وتعالى yang mana dengan makrifat itu dia tidak terhina kepada mana-mana makhluk.



فَاصْبِرْ إِنَّ الْعَاقِبَةَ لِلْمُتَّقِينَ.

“Oleh itu, bersabarlah, sesungguhnya kesudahan yang baik adalah bagi orang-orang yang bertaqwa” Saiyidina Hud: 49

وَاصْبِرْ وَمَا صَبْرُكَ إِلَّا بِاللَّهِ وَلَا تَحْزَنْ عَلَيْهِمْ وَلَا تَكُ فِي ضَيْقٍ مِّمَّا يَمْكُرُونَ...
إِنَّ اللَّهَ مَعَ الَّذِينَ اتَّقَوْا وَالَّذِينَ هُمْ مُحْسِنُونَ.

“Dan bersabarlah (Wahai Muhammad terhadap perbuatan dan telatah golongan yang ingkar itu); dan tiadalah berhasil kesabaranmu melainkan dengan (memohon pertolongan) Allah; dan janganlah engkau berdukacita terhadap kedegilan mereka, dan janganlah Engkau bersempit dada disebabkan tipu daya yang mereka lakukan. Sesungguhnya Allah beserta golongan yang bertaqwa, dan muhsinin (yang berusaha memperbaiki amalannya)”

An-Nahl: 127-128

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ telah ditanya tentang warak, maka kata beliau: “Warak adalah jalan tareqat yang terbaik bagi mereka yang disegerakan warisannya (bersambung sanadnya) dan ditangguhkan ganjarannya (di negeri Akhirat kerana ialah negeri ganjaran dan anugerah). Warak telah membawa mereka hingga ke tahap mengambil dari Allah dan dengan Allah, berkata dengan Allah, beramal kerana Allah dan dengan Allah atas keterangan yang jelas, dan penglihatan yang tembus. Mereka para umum waktu-waktu mereka dan seluruh ahwal mereka tidak mentadbir, tidak memilih, tidak berkehendak, tidak berfikir, tidak melihat, tidak berkata-kata, tidak melakukan tindakan, tidak berjalan dan tidak bergerak melainkan dengan Allah dan kerana Allah tanpa mereka ketahui.

Ilmu tentang hakikat telah menyelubungi mereka maka mereka pun terhimpun di dalam `ainul jam’i (inti himpunan), mereka tidak berpecah kepada apa yang lebih tinggi, tidak juga kepada yang lebih rendah dan tidak kepada yang lebih rendah dari yang rendah. (Maqam mereka di mana Allah mendirikan mereka).

“Dari itu Allah memberi balasan pahala atas kewarakan mereka yang disertai penjagaan pada munazalat (tuntutan) syarak ke atas mereka.

‘Barangsiapa yang ilmu dan amalnya tidak berasal dari warisan (syekh dan sanad) maka dia adalah terhijab dengan dunia, atau terkendali dengan dakwa, padahal warisannya adalah berumia diri dengan akhlaknya, membesar diri kepada yang sepertinya, bertarung dengan ilmunya dan menunjuk kepada Allah dengan pengetahuannya... maka inilah kerugian yang nyata wal’iyadzu billahil azhim dari yang demikian.

“Ada pun orang-orang cerdas mereka bersikap warak dari kewarakan semacam ini lagi berlindung kepada Allah darinya. Siapa yang dengan ilmu dan amalnya tidak bertambah (1) Kefakiran kepada Tuhannya (2) Tawadhu’ terhadap makhlukNya maka dia adalah binasa. (Allahumma Robbana, selamat dan selamatkanlah kami).

“Maha Suci Allah tuhan yang telah memutuskan hubungan ramai kalangan ahli kesolehan dengan kesolehan mereka dari yang membuat mereka jadi soleh, seperti mana dia memutuskan mereka yang membuat kerosakan dengan kerosakan mereka dari yang menciptakan mereka (Dialah Allah Tabaroka wa Taala)

فَاسْتَعِذْ بِاللَّهِ إِنَّهُ هُوَ السَّمِيعُ الْبَصِيرُ

“Oleh itu mintalah perlindungan kepada Allah (dari angkara mereka); sesungguhnya Dia lah jua yang Maha Mendengar lagi Maha Melihat.” Ghafir: 56

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Muliakanlah orang-orang beriman walau mereka ahli maksiat sekalipun. Akan tetapi dirikanlah ke atas mereka segala ketentuan hukum dan pulaukanlah mereka sebagai mengasihi mereka. Janganlah engkau merasa jijik terhadap mereka (meremehkan, benci dan menjauh diri dari



Bekalan Murid Ke Jalan Akhirat

mereka). Janganlah engkau mentauladani orang yang bersikap warak dari apa yang disentuh oleh tangan-tangan mereka yang beriman tapi dia tidak warak dari apa yang disentuh oleh tangan para kafirin. Sesungguhnya dia tahu apa yang berlaku kepada batu (Hajar Al-As`ad di penjuru Kaabah yang asalnya turun dari langit dalam keadaan putih bersih, kemudian menjadi hitam warnanya) kerana disentuh oleh tangan-tangan musyrikin maka jadi hitamlah ia.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai ikhlas: "Ikhlas adalah satu cahaya dari cahaya Allah yang disimpan Allah pada hati hambanya yang mukmin, maka cahaya itu telah memutuskan si hamba dari selain Allah.

"Demikian itulah asal ikhlas, kemudian ia bercabang menjadi empat kemahuan: (1) Mahu ikhlas dalam amal kerana mentakzim Allah, (2) Mahu ikhlas kerana mentakzim perintah Allah (3) Mahu ikhlas kerana menuntut balasan dan pahala (4) Mahu ikhlas dalam memurnikan amalan dari segala kekeruhan... dia tidak menjaga dalam amalannya selain itu.

"Semua kemahuan ini Allah Subhanahu wa Taala perintahkan kepada kita, maka barangsiapa yang berpegang dengan salah satu dari kemahuan ini dia berada pada darjat ikhlas di sisi Allah

إِنَّ اللَّهَ يَعْلَمُ غَيْبَ السَّمَاوَاتِ وَالْأَرْضِ وَاللَّهُ بَصِيرٌ بِمَا تَعْمَلُونَ.

"Sesungguhnya Allah mengetahui segala rahsia langit dan bumi, dan Allah Maha Melihat akan segala yang kamu kerjakan". **Al-Hujurat: 18**

"Senada dengan isyarat tadi dihikeyatkan bahawa Saiyidina Jibril عَلَيْهِ الصَّلَاةُ وَالسَّلَامُ telah menyampaikan wahyu (hadis qudsi) dari Allah kepada Saiyidina wa Maulana Rasulullah ﷺ:

الإِخْلَاصُ سِرٌّ مِنْ سِرِّي (فِي رِوَايَةٍ : أَسْرَارِي) اسْتَوْدَعْتُهُ قَلْبَ مَنْ أَحَبَبْتُهُ مِنْ عِبَادِي.

“Ikhlâs adalah satu rahsia dari rahsiaKu (dalam riwayat lain: dari sekian banyak rahsiaKu), Aku simpan ia pada hati siapa yang Ku cintai di kalangan hambaKu.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Aku bermimpi melihat seolah-olah aku tawaf di Kaabah sambil menuntut diriku supaya ikhlas, dan aku memeriksanya di dalam sirrku. Tiba-tiba aku diseru: Wahai Ali! Berapa banyak engkau berlagu dengan mereka yang berlagu sedangkan Aku yang Maha Mendengar, Maha Dekat, Maha `Alim lagi Maha Memberi Khabar? Lagi pengenalanKu sudah mencukupkanmu dari ilmu para awwalin dan akhirin, selain ilmu Rasul dan ilmu para nabi. Sesungguhnya ia adalah empat perkara: (1) Keikhlasan (2) Dari yang ikhlas (3) Amal yang diikhlasakan (4) Kepada yang dipersembahkan keikhlasan itu.

“Keikhlasan itu dua bentuk: (1) Ikhlas golongan sodiqin (2) Ikhlas golongan siddiqin. Ikhlas golongan sodiqin demi menuntut ganjaran dan pahala, ikhlas golongan siddiqin pula dengan memandang wujud Al-Haq yang dimaksudkannya, tidak ada suatu apa pun selainNya.

“Maka barangsiapa yang hal itu dititipkan ke dalam hatinya dialah yang dikecualikan seperti yang disebut oleh lisan musuhNya (Syaitan terkutuk) yang dalam firman Allah tabaroka wa taala:

وَلَا تُؤْمِنُ بِهِمْ أَجْمَعِينَ... إِلَّا عِبَادَكَ مِنْهُمْ الْمُخْلِصِينَ.

“...(Iblis berkata) dan nescaya aku akan menyesatkan mereka semuanya, kecuali di antara zuriat-zuriat Adam itu hamba-hambaMu yang diikhlasakan”. Al-Hijr: 39-40

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau mahu keselamatan dari sifat ghurur (tertipu dengan diri sendiri) maka (1) Ikhlaslah amalmu kepada Allah dengan syarat ilmu



dan (2) Janganlah engkau redho dengan dirimu barang suatu apa pun.

وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَىٰ .. فَإِنَّ الْجَنَّةَ هِيَ الْمَأْوَىٰ

“Adapun orang yang takutkan keadaan semasa ia berdiri di mahkamah Tuhannya, (untuk dihitung amalnya), serta dia menahan dirinya dari menurut hawa nafsu, -maka sesungguhnya syurgalah tempat kediamannya.” An-Nazi`at: 40-41

Maka fahamilah perkara ini nescaya engkau menang dan jaya,untutlah ilmu yang bermanfaat serta adab-adab yang diredhoi, janganlah sekali-kali engkau meninggalkan tarbiyyah dan pemurnian dirimu melalui komitmen terhadap amalan zikir, mujahadah siang dan malam, hadir majlis-majlis zikir serta kesungguhan yang jitu terhadap khidmat dan dampingan kepada syeikh, murobbi, mahaguru dan mursyidmu.



Bab 47

YAKIN, KERAMAT DAN ILMU

Ada empat perkara yang menjadi keinginan, kesukaan dan tuntutan kita, namun dalam masa yang sama ia merupakan titik kelemahan kita, ia juga adalah jebak di perjalanan, parit penghadang, halangan, rintangan, hijab, fitnah, musibah dan juga mungkin menjadi musuh dalam kembara kita di jalan menuju Allah: (1) Harta benda (2) Anak pinak (3) Suami isteri (4) Kehidupan duniawi.

Jadi bagaimana seharusnya kita melakukan imbalan tanpa terlampau mengurangkan atau melebihi hak sesiapa? Bagaimana kita dapat belajar, menerima didikan, pemurnian dan beramal agar dapat kita berpindah dari hendak kemudahan itu dan ini kepada kehendak *futuwwah* (kepahlawanan) dan azam jitu? Dan bagaimana kita dapat hidup dengan serasi bersama keempat perkara itu kemudian kita mengambil sikap zuhud, warak dan taqwa

وَلَا تَنْسُوا الْفَضْلَ بَيْنَكُمْ إِنَّ اللَّهَ بِمَا تَعْمَلُونَ بَصِيرٌ.

“...dan janganlah pula kamu lupa budi kebaikan sesamamu sendiri. Sesungguhnya Allah sentiasa melihat akan apa jua yang kamu kerjakan” **Al-Baqarah: 237**

Lihat dan renunglah apa kata Tuhan kita di dalam Al-Quranul Karim mengenai empat perkara ini:



يَا أَيُّهَا الَّذِينَ آمَنُوا إِنَّ مِنْ أَزْوَاجِكُمْ وَأَوْلَادِكُمْ عَدُوًّا لَكُمْ فَاحْذَرُوهُمْ

Wahai orang-orang yang beriman! Sesungguhnya ada di antara isteri-isteri kamu dan anak-anak kamu menjadi musuh bagi kamu; oleh itu awaslah kamu terhadap mereka.” **At-Taghabun: 14**

إِنَّمَا أَمْوَالُكُمْ وَأَوْلَادُكُمْ فِتْنَةٌ وَاللَّهُ عِنْدَهُ أَجْرٌ عَظِيمٌ

“Sesungguhnya harta benda kamu dan anak-anak kamu itu hanyalah menjadi ujian, dan di sisi Allah jualah pahala yang besar.” **At-Taghabun: 15**

وَاعْلَمُوا أَنَّمَا أَمْوَالُكُمْ وَأَوْلَادُكُمْ فِتْنَةٌ وَأَنَّ اللَّهَ عِنْدَهُ أَجْرٌ عَظِيمٌ

“Dan ketahuilah bahawa harta benda kamu dan anak-anak kamu itu hanyalah menjadi ujian, dan sesungguhnya di sisi Allah jualah pahala yang besar.” **Al-Anfal: 28**

اعْلَمُوا أَنَّمَا الْحَيَاةُ الدُّنْيَا لَعِبٌّ وَلَهُمْ زِينَةٌ وَتَفَاخُرٌ بَيْنَكُمْ وَتَكَاثُرٌ فِي الْأَمْوَالِ وَالْأَوْلَادِ

“...Dan ketahuilah bahawa kehidupan dunia itu tidak lain hanyalah permainan dan hiburan (yang melalaikan) serta perhiasan (yang mengurangkan), juga (bawaan hidup yang bertujuan) bermegah-megah di antara serta berlumba-lumba membanyakkan harta benda dan anak pinak....” **Al-Hadid: 20**

وَمَا الْحَيَاةُ الدُّنْيَا إِلَّا مَتَاعُ الْغُرُورِ

“...Dan tiadalah kehidupan dunia itu melainkan mata benda yang menipu” **Al-Hadid: 20**

Kita teruskan lagi pada siri ini dengan bicara mengenai yakin, keramat dan ilmu.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai ilmu yaqin, `aynul yaqin dan haqqul yaqin dengan katanya: “Antara ilmu yaqin dengan Allah serta yakin dengan apa disediakan Allah untukmu ialah engkau bermu`amalah (berinteraksi) dengan makhluk dan sesama mereka dengan interaksi yang engkau tidak diperkecilkan di sisi Allah Subhanahu wa Taala walau pun engkau dipandang kecil pada mata makhluk tapi dengan tidak bertentangan syarak dan tidak digugat oleh tabiat yang baik.

“Bahkan termasuk dari `aynul yaqin melupakan makhluk ketika ditimpa bencana atau didatangi faedah secara berturut-turut... yang demikian itu dengan syawahid (kesaksian) yang terang jelas (Al-Musyahadah adalah maqam selepas al-kasyf dan sebelum maqam al-`iyan).

“Bahkan termasuk dari haqqul yaqin adalah perbezaan dalam sesuatu seakan-akan kamu adalah sesuatu itu sendiri. Laksana orang yang terpaksa melihat laut lalu dia menyeberangnya, lalu kapalnya pecah, lalu dia dihempas ombak yang bergulung-gulung (-wallahu a’lam- inilah dia yang dimaksudkan dengan maqam al-`iyan). Dan inilah -wallahu a’lam- yang dimaksudkan dengan maqam al-wushul.

1. Ada kalangan mereka selepas fana’ (sirna) pergilah dia bersama mereka yang pergi lalu dipindahkan ke darjat al-`illiyyin.
2. Ada juga kalangan mereka selepas fana’ tetap hidup dan baqa’ (tinggal) bersama yang masih ada dan dia tiada bahagian dalam pentauladanan (dia tidak mampu mentarbiyyah, tidak mampu memikul tanggungjawab mursyid, tidak mampu memimpin suluk para murid... dia hanya syeikh untuk dirinya sendiri) bahkan keadaannya adalah tertutup dari seluruh makhluk.
3. Ada kalangan mereka yang kekal sebagai barzakh antara



Allah Al-Haq Subhanahu wa Taala dengan makhluk (khususnya para murid. Barzakh itu ialah syeikh kamil yang diperlukan di mana adanya, mencarinya adalah fardhu ain bagi peribadi yang mahu lari kepada Allah dan menempuh jalan Akhirat serta kembara pada maqam-maqam para saa'irin. Ciri syeikh ini adalah) zahir dengan lantikan, kamil pada kedua sifat (sifat lahir dan batin) serta menjadi ikutan manusia dan jin.

4. Ada kalangan mereka yang menjadi Al-Imamul Akbar Al-Fard Al-Quthb Al-Ghauts Al-Jami' yang diistimewakan dengan asma' dan sifat, segala cahaya dan akhlak dan lagi segala yang tak mampu didengar oleh siapa yang mendengar.

“Di bawah mereka ada golongan yang tidak punya darjat dari kalangan awliya' ahli taqwa, ahli zuhud dan ahli peneliti yang memiliki dalil dan bukti tetapi mereka masih belum dapat melihat dengan kasyf dan `iyan.

“Di bawah dari golongan ini adalah orang-orang yang berperantara dengan berbagai amalan serta ahwal, dan ada golongan yang mencampur aduk pada perkataan dan perbuatan.

وَمَنْ يُهِنِ اللَّهُ فَمَا لَهُ مِنْ مُكْرِمٍ إِنَّ اللَّهَ يَفْعَلُ مَا يَشَاءُ

“...dan (ingatlah) sesiapa yang dihinakan oleh Allah maka ia tidak akan beroleh sesiapa pun yang dapat memuliakannya. Sesungguhnya Allah tetap melakukan apa yang dikehendakiNya.” **Al-Hajj: 18**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika engkau seorang mukmin yang berada di maqam yakin maka jadikanlah segalanya sebagai musuhmu sepertimana yang telah dikatakan oleh Saiyidina Ibrahim عليه الصلاة والسلام:

فَاِنَّهُمْ عَدُوِّيْ اِلَّا رَبَّ الْعَالَمِيْنَ

“... kerana sesungguhnya semua (berhala-berlala itu) mereka ialah musuhKu, (aku tidak menyembah) melainkan Allah Tuhan semesta alam.” **As-Syu`ara': 77**

“Maksud dari perkataan ini ialah engkau meninggalkan segalanya lalu bertawajjuh kepada Tuhan segalanya. Adapun jalan yang paling mudah untuk mentahqiq dan merealisasikan keadaan itu ialah engkau lari dari mereka dengan anggapan bahawa mereka adalah musuh dan penghadang jalanmu menuju Allah.

“Jika maqammu adalah Muhammadi maka baca dan fahamilah ayat ini:

قَدْ نَبَّأَنَا اللَّهُ مِنْ أَخْبَارِكُمْ وَسَيَرَى اللَّهُ عَمَلَكُمْ وَرَسُولُهُ

“...Sesungguhnya Allah telah menerangkan kepada kami akan berita-berita perihal kamu; dan Allah serta RasulNya akan melihat amal kamu...” **At-Taubah: 94**

“Keluarkanlah pemisah pada ayat ini dengan dua perkara;

Yang akan melihat amalmu di masa mendatang pastinya Saiyidina wa Maulana Muhammad Ar-Rasul ﷺ, adapun Allah Subhanahu wa Taala maka Dia tidak tertakluk kepada masa lalu mahu pun masa akan datang kerana di sisiNya dan bersamaNya tiada apa yang menghadkanNya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Orang sodiq (jujur) yang yakin kalau pun dia didustai oleh seluruh warga bumi nescaya itu takkan menambah kepadanya melainkan keyakinan. Kalau pun seluruh warga bumi mempercayainya nescaya itu tidak menambah baginya melainkan tamkin (kemantapan).

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ menghidkayatkan bahawa mahagurunya Saiyidina As-Syeikh Al-Kamil Abdus Salam bin Masyish رَضِيَ اللَّهُ عَنْهُ وَأَرْضَاهُ berkata: “Empat ciri jika seseorang memilikinya maka makhluk akan memerlukannya sedangkan



Bekalan Murid Ke Jalan Akhirat

dia terkaya dari segalanya: (1) Mahabbah kerana Allah (2) Kaya dengan Allah (3) Kejujuran dalam `ubudiyyah (4) Yakin dengan hukum hakam rububiyyah

وَمَنْ أَحْسَنُ مِنْ اللَّهِ حُكْمًا لِّقَوْمٍ يُوقِنُونَ

“...padahal -bagi orang-orang yang penuh keyakinan- tiada siapa yang lebih baik hukumnya daripada Allah.” Al-Ma`idah: 50

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai karamah (kemuliaan): “Hamparan dan maqam karamah ada empat: (1) Cinta yang hanya menyibukkan engkau denganNya dan bukan selainNya (2) Redho yang dengannya engkau menyambungkan cintamu dengan cintaNya (3) Zuhud yang merealisasikanmu dengan zuhud RasulNya ﷺ (4) Tawakkal yang menyingkap bagimu hakikat kudratNya.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Karamah (kemuliaan) Allah ada pada sifat redho yang melekatkanmu dari segala musibah hinggalah hari pertemuan.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Karamah golongan siddiqin lima: (1) Senantiasa dalam zikir dan ketaatan dengan syarat istiqamah (2) Zuhud terhadap dunia dengan mengutamakan sedikit dan kurang (3) Memperbaharui keyakinan dalam tentangan dan gangguan (4) Adanya rasa kejauhan terhadap ahli manfaat dan rasa mesra dengan ahli mudarat (5) Zahir pada badan mereka perkara-perkara yang tidak dengan hukum adat seperti melipat bumi, berjalan di atas air dan lain-lain. Adapun kelebihan ini berlaku pada waktunya, pada orangnya dan pada tempatnya, lalu barangsiapa menuntutnya pada bukan waktunya nescaya kemungkinan untuk mendapat dan mencapainya adalah sedikit.

“Secara umumnya kelebihan ini tidak diberi kepada orang yang menuntutnya, juga tidak kepada orang yang dirinya bercita-cita

mendapatkannya dan tidak kepada orang yang menggunakan nafsunya dalam menuntunya.

“Sesungguhnya kelebihan ini diberi kepada seorang abdi yang tidak melihat kepada dirinya dan tidak kepada amalannya. Dia sibuk dengan kecintaan kepada Allah, dengan dampingan dan taqarrub kepada Allah, dengan mahabbah kepada Allah Tabaroka wa Taala. Dia sentiasa menilik kepada kurniaan Allah Subhanahu wa Taala lagi berputus asa terhadap diri sendiri dan amalannya.

“Boleh juga karamah terjadi kepada orang yang istiqamah pada zahirnya

وَلَوْلَا فَضْلُ اللَّهِ عَلَيْكُمْ وَرَحْمَتُهُ لَاتَّبَعْتُمُ الشَّيْطَانَ إِلَّا قَلِيلًا

“...dan jika tidaklah kerana limpah kurnia Allah dan belas kasihanNya kepada kamu, tentulah kamu (terbabas) menurut Syaitan, kecuali sedikit (dikalanganmu).” An-Nisa’: 83

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Demi sesungguhnya di sini ada dua karamah yang menghimpun dan meliputi di dunia: (1) Karamah iman dengan bertambah keyakinan dan syuhud al-`iyan (2) Karamah amal dengan mengikut tauladan, menjejak perjalanan serta menghindar dakwa dakwi dan tipu daya.

“Lalu barangsiapa telah diberi kedua karamah itu lalu dia merindurindu kepada selain keduanya maka jadilah dia hamba yang bohong dan mereka-reka dusta atau dia ada tersalah dalam ilmu dan amalan yang betul.

“Perumpamaannya seperti orang yang telah dimuliakan untuk mengadap raja, mengkhidmati raja hingga beroleh inti keredhoan diraja namun dia merindu-rindu kepada pekerjaan gembala binatang dan mahu menanggalkan keredhoan itu.

“Adapun tiap karamah yang tidak disertai dengan redho dari Allah dan dengan Allah maka orang yang memiliki karamah itu sebenarnya sedang diistidrajkan (digelincirkan) lagi tertipu, atau dia kekurangan



Bekalan Murid Ke Jalan Akhirat

sesuatu, atau dia orang binasa.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Wali yang bertaraf quthb dan ghauts itu memiliki lima belas karamah, lalu barang siapa mendakwa dirinya quthb dan ghauts maka dipersilakanlah dia mempamerkan: (1) Madad ar-rahmah (bantuan rohani yang mendatangkan rahmat) (2) `Ishmah (penjagaan) (3) Kekhalifahan (4) Madad dari penjaga arasy yang agung (5) Disingkapkan baginya dari hakikat Zat Ilahi dan meliputi pengetahuan sifat (6) Dimuliakan dengan karamah hukum dan (7) Pemutusan antara dua kewujudan dan (8) Pemisahan yang awal dari yang awal dan (9) Apa yang terpisah darinya kepada penghujungnya dan (10) Apa yang sabit di dalamnya dan (11) Hukum apa yang sebelum dan (12) Hukum apa yang selepas dan (13) Hukum apa yang tiada sebelum baginya dan (14) Hukum apa yang tiada selepas baginya dan (15) Ilmu al-bida’ yaitu ilmu yang meliputi segala ilmu dan segala yang diketahui bermula dari sirr yang pertama hingga ke penghujungnya kemudian kembali kepadanya.”

Kata-kata ini saya sebutkan sebagai tabarruk atas kurniaan Allah Subhanahu wa Taala

رَبُّنَا الَّذِي أَعْطَى كُلَّ شَيْءٍ خَلْقَهُ ثُمَّ هَدَى

"Tuhan kamilah yang telah memberikan kepada tiap-tiap sesuatu: kejadian semulajadinya yang sesuai dengannya, kemudian Dia memberi petunjuk kepadanya ...". Saiyidina Thaha: 50

...bukan tujuan saya memberi syarah atau mengulas, tapi semata-mata tasdiq dan taslim.

مَتَى أَرَاهُمْ وَأَنَا لِمِثْلِي أَنْ يُزَاحِمَهُمْ عَلَى مَوَارِدَ لَمْ أَلْفِ بِهَا كَدْرًا

"Bilakah dapat ku lihat mereka, bagaimanakah orang sepertiku dapat bersama mereka, di sumber air yang kekeningan..."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Dikatakan kepadaku: “Jika engkau mahu kemuliaanKu maka hendaklah engkau mentaatiKu dan membelakangi maksiat terhadapKu. Jika engkau tergelincir dikalahkan syahwat dan keagungan kudrat maka ketahuilah kedekatanKu kepadamu, pandanganKu kepadamu, pengliputanKu terhadapMu dan kudratKu ke atasmu. Selamatkanlah dirimu dariKu dan dari keagungan kudratKu.

“Dan katakanlah: “Dia Maha Wujud sebelum kewujudan tiap suatu, Dia sekarang sepertimana keadaan wujudNya. Wahai yang Maha Awal, Maha Akhir, Maha Zahir dan Maha Batin... bumi menjadi sempit buat diriku, tiada keselamatan dariMu melainkan dengan berlindung kepadaMu, maka taubatkanlah aku supaya dapat aku bertaubat, sesungguhnya Engkaulah Tuhan yang Maha Menerima Taubat lagi Maha Merahmati.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Aku bermimpi melihat diriku seolah-olah berdiri di hadapan Allah Azza wa Jalla, maka Allah berfirman: “Jangan engkau merasa aman dari makarKu walau pun Aku telah mengamankanmu.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Janganlah engkau berpaling kepada ilmu, amal atau madad. Dalam hal itu hendaklah engkau bersama dengan Allah, dari Allah, kerana Allah dan serta Allah selama-lamanya.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Janganlah engkau menyebarkan ilmumu supaya manusia percaya kepadamu, tapi hendaklah engkau menyebarkan ilmumu supaya Allah Tabaroka wa Taala percaya kepadamu. Walau pun ada “kerana” namun kerana itu adalah antara kamu dengan Allah dari sisi yang Allah menyuruhmu itu lebih baik bagimu dari “kerana” yang antaramu dengan manusia dari sisi yang Allah melarangmu.

“Kerana yang mengembalikanmu kepada Allah lebih baik bagimu dari kerana yang memutuskan engkau dari Allah. Kerana itulah Allah menggantungkan amalanmu dengan pahala dan hukuman, kerana



Bekalan Murid Ke Jalan Akhirat

tiada yang berhak diharap dan tiada yang berhak ditakuti selain dari pihak Allah... dan cukuplah Allah sebagai yang Maha Jujur dan yang mempercayaimu. Jadilah kamu dengan Allah sebagai alim dan guru mengajar dan cukuplah Allah bagimu sebagai yang memberi petunjuk, penolong dan pembela.

“Dia sebagai yang memberi petunjuk ertinya Dia menghidayatkanmu, Dia menjadikan engkau sebab orang lain mendapat petunjuk dan dia menunjukkan orang lain kepadamu. Dia sebagai penolong ertinya Dia menolongmu, Dia menjadikan engkau sebab orang lain beroleh pertolongan dan Dia tidak menolong musuh ke atasmu. Dia sebagai pembela ertinya Dia membelamu, Dia menjadikan engkau lantikanNya dan Dia tidak melantik yang lain ke atasmu.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Ilmu-ilmu ini adalah dasar-dasar dan kepala-kepala, juga penjelasan kepada lokasi-lokasi jiwa, segala lintasannya, makarnya dan kehendaknya. Ia juga memutuskan hati dari renungan, bersenang-lenang dan kecenderungan atas jalan tauhid dan syarak dengan kemurnian mahabbah dan mengikhlaskan agama dengan sunnah.

“Mereka beroleh tambahan di maqam-maqam keyakinan dengan: zuhud, sabar, syukur, harap, takut, tawakkal, redho dan lain-lain lagi di maqam-maqam yakin. Maka inilah jalan bagi mereka yang mahu menempuh jalan mu`amalat kerana Allah.

“Adapun para Ahlillah dan golongan istimewaNya maka mereka adalah kaum yang:

1. Allah sentap mereka dari kejahatan dan dari segala dasar kejahatan.
2. Allah mengerjakan mereka pada kebaikan dan segala cabang kebaikan.
3. Allah menyukakan mereka kepada khalwah (menyendiri).
4. Allah membuka bagi mereka jalan-jalan munajat.

“Allah berkenalan dengan mereka lalu mereka pun mengenalNya. Allah mencintai mereka lalu mereka pun mencintaiNya. Allah menunjuk kepada mereka jalan kepadaNya maka mereka pun menempuhnya. Mereka bersama Allah dan untuk Allah. Allah tidak membiarkan mereka kepada selainNya dan Allah tidak menghijab mereka dariNya.

“Bahkan mereka terhijab dari selainNya, yang mereka kenal hanya Dia dan mereka tidak mencintai melainkan Dia semata

أُولَئِكَ الَّذِينَ هَدَاهُمُ اللَّهُ وَأُولَئِكَ هُمْ أُولُوا الْأَلْبَابِ

“...mereka itulah orang-orang yang diberi petunjuk oleh Allah dan mereka itulah orang-orang yang berakal sempurna.” **Az-Zumar:**

18

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Aku telah bermimpi melihat Saiyidina wa Maulana junjungan Nabi ﷺ bersama Saiyidina Nuh عليه الصلاة والسلام dan ada satu malaikat di hadapan mereka berdua.

Maka berkata malaikat itu: “Kalaulah Saiyidina Nuh عليه الصلاة والسلام tahu dari kaumnya sepertimana Saiyidina wa Maulana Muhammad ﷺ tahu dari kaumnya nescaya Saiyidina Nuh takkan mendoakan kaumnya:

لَا تَذَرُ عَلَى الْأَرْضِ مِنَ الْكَافِرِينَ دَيَّارًا .. إِنَّكَ إِنِ تَذَرُهُمْ يُضِلُّوا عِبَادَكَ وَلَا يَلِدُوا إِلَّا فَاجِرًا كَفَّارًا.

“Wahai Tuhanku! janganlah Engkau biarkan seorang pun dari orang-orang kafir itu hidup di atas muka bumi! Kerana sesungguhnya jika Engkau biarkan mereka (hidup), nescaya mereka akan menyesatkan hamba-hambaMu, dan mereka tidak akan melahirkan anak melainkan yang berbuat dosa lagi kufur ingkar.” **Saiyidina Nuh:**

26-27

“Dan ini tempat ilmu hakiki yang tidak berubah. Dan kalaulah



Bekalan Murid Ke Jalan Akhirat

Saiyidina wa Maulana Muhammad ﷺ mengetahui dari kaumnya apa yang diketahui oleh Saiyidina Nuh عَلَيْهِ السَّلَامُ dari kaumnya nescaya Baginda juga takkan memberi tangguh kepada mereka walau sekerdip mata. Namun Baginda tahu pada keturunan mereka ada yang akan beriman dengannya dan bahagia bertemu Tuhan, maka Baginda pun berdoa:

اللَّهُمَّ اغْفِرْ لِقَوْمِي فَإِنَّهُمْ لَا يَعْلَمُونَ.

"Allahumma ampunilah kaumku, sesungguhnya mereka tidak mengetahui."

"Maka masing-masing baginda melakukannya atas ilmu dan keterangan dari Allah, dan setiap orang dari mereka melazimi doa yang dilazimkan ke atasnya," kemudian malaikat itu berkata: "Bukankah begitu?!" lalu kedua baginda pun menjawab: "Bahkan!." Kemudian malaikat itu berkata:

"Barangsiapa berjihad melawan nafsunya, hawanya, syaitannya, syahwatnya dan dunianya lalu dia menang maka dia adalah hamba yang jaya, dibantu dan mendapat pahala.

"Ada pun bagi yang melawan empat musuh itu lalu dia yang tewas maka dia diampuni dan disyukuri; (1) selagi tidak kekal dalam dosa, atau (2) redho dengan keaiban, atau (3) gugur darinya rasa takut di sisi ghaib. Lalu barangsiapa yang ada padanya salah satu dari tiga ciri tadi dan dia tahu (yakin benar) bahawa dirinya ada Tuhan yang mengampuni dosa dan menghukum dengannya, dia beriman dengan segala ketentuan Tuhannya, dia takut kepada akibat dosanya dan malu kepada Tuhannya; maka orang ini rahmat akan turun kepadanya lebih segera dari hujan turun ke bumi.

"Dan Allah berkata: "Keadaan yang paling mendapat belas kasihan pada hambaKu ialah ketika dia berpaling dariKu, dan keadaannya yang paling mulia ialah ketika dia menuju kepadaKu. Ada pun hamba yang binasa adalah orang yang gembira dengan maksiat

jika dia melakukannya, dia bersedih jika tidak dapat melakukannya, dia berbangga dengan maksiat dan tidak sembunyi-sembunyi melakukannya. -Kami mohon lindungan Allah dari yang demikian-, dan orang ini berada dalam kehendak Allah.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Hakikat pengetahuan pada kebaikan ialah ketenangan di dalamnya, manakala hakikat pengetahuan pada kejahatan ialah keluar daripadanya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Ibarat segala ilmu pada hati itu adalah seperti wang dirham dan dinar pada tangan; jika Dia mahu nescaya dimanfaatkan engkau dengannya dan jika dia mahu nescaya dimudaratkan engkau dengannya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Angkatlah (hindarilah) hatimu dari tujuh perkara ini: (1) Keadaan tiada berilmu (2) tiada amalan (3) tiada keistimewaan (4) tiada simpanan (5) tiada tempat (6) tiada latha`if dan (7) tiada hakikat yang dapat menyelamatkanmu dari ketetapan Allah Tabaroka wa Taala.

Alangkah indahnya agama yang murni ini

أَلَا لِلَّهِ الدِّينُ الْخَالِصُ

“Ingatlah! (hak yang wajib dipersembahkan) kepada Allah ialah segala ibadat dan bawaan yang suci murni.” **Az-Zumar: 3**

...alangkah indahnya aqidah dan tauhid pada agama ini

وَمَا يُلْقَاهَا إِلَّا الَّذِينَ صَبَرُوا وَمَا يُلْقَاهَا إِلَّا ذُو حَظٍّ عَظِيمٍ

“Dan sifat yang terpuji ini tidak dapat diterima dan diamalkan melainkan oleh orang-orang yang bersikap sabar, dan tidak juga dapat diterima dan diamalkan melainkan oleh orang yang mempunyai bahagian yang besar (dari kebahagiaan dunia dan Akhirat).” **Fussilat: 35**



Bab 48

IRADAAT, IMAN, ISLAM DAN TAUHID

Kita teruskan dalam siri ini dengan bicara pada topik *iradaat* (kehendak), iman, Islam, tauhid dan `ubudiyyah.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai iradaat dengan katanya: “Dasar-dasar iradaat atas mazhab para sufi yang muhaqqiqin (para pemilik futuh) berdiri di atas empat perkara: (1) Kejujuran dalam `ubudiyyah (2) Sikap tidak memilih pada hukum rububiyyah (hukum ketuhanan) (3) Mengambil dengan ilmu pada tiap perkara (4) Mengutamakan Allah dengan mahabbah pada tiap perkara.

“Kejujuran terbina di atas empat dasar: (1) Takzim (2) Mahabbah (3) Malu (4) Merasa kehebatanNya.

“Sikap tidak memilih terbina di atas empat dasar: (2) Syuhud dalam *qabdah* (2) Tahqiq dengan *washlah* (4) Percaya terhadap jaminan Allah dan janjiNya.

“Mengambil dengan ilmu terbina di atas empat dasar: (1) Sama ada dari jalan isyarat (2) atau dari jalan muwajahah (berhadap-hadapan) (3) atau dari jalan kefahaman (4) atau dari jalan pendengaran.

“Mengutamakan Allah dengan mahabbah terbina di atas empat dasar: (1) Mengutamakan Allah yang maha mengadakan dari sekalian

yang ada (2) Mengutamakan sifat(Nya) dengan memperbaiki bagi sekalian yang ada (3) Mengutamakan perbuatanNya dengan redho pada tiap kehilangan (4) Mengutamakan apa yang dikasihi olehNya Subhanahu wa Taala atas apa yang dikasihi oleh dirimu.

Kenyataan ini bagi yang telah jaya, bagi yang belum maka hendaklah dia bersama (mendamping) dengan syeikh kamil yang jaya dalam kedudukan ini. Fahamilah nescaya engkau akan jaya.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ mengulas bicara para junjungan sufi رَضُوا اللَّهَ عَلَيْهِمْ أَجْمَعِينَ yang berkata: “Barangsiapa yang tidak soheh iradah (kehendak)nya maka hari demi hari yang berlalu tidak menambah baginya melainkan kemunduran.”

Maka berkatalah Syeikh رَضِيَ اللَّهُ عَنْهُ: “Lalu barangsiapa yang mahu iradahnya soheh hendaklah dia menghubungkan urusannya dengan ilmu secara menolak kejahilan, menolak dunia dan dengan menuju kepada Akhirat. Hendaklah dia melazimi khalwah dan sentiasa zikir lalu di sanalah akan terzahir padanya kesan-kesan dari segala keistimewaan dengan cahaya dan seri di wajah.

“Manusia akan berdatangan kepadanya lelaki dan wanita dari kota dan desa. Mereka bersegera memuliakannya, mengucap salam kepadanya dan mentakzimnya. Jika dia menerima itu semua dari mereka sebelum mencapai tamakkun (kemantapan) dan tahqiq maka dia akan jatuh dari pandangan Allah dan akan dikembalikan kepada apa yang dia keluar darinya.

“Maka jadilah dia terkadang memuji ini, terkadang mengeji itu, terkadang melakukan helah ke atas yang ini, terkadang berpaling dari yang itu, terkadang marah pada yang ini... Sesungguhnya aurat dirinya telah tersingkap kerana berpalingnya dia dari Tuhannya dan kerana dia menolak apa yang dikasihi Allah demi memilih apa yang dikasihinya.

“Maka hendaklah kamu awas terhadap penyakit besar ini, sesungguhnya telah ramai orang binasa kerananya. Berpegang teguhlah kamu kepada Allah



وَمَنْ يَعْتَصِمِ بِاللَّهِ فَقَدْ هُدِيَ إِلَى صِرَاطٍ مُسْتَقِيمٍ

"...dan barangsiapa berpegang teguh kepada Allah, maka sesungguhnya dia telah beroleh petunjuk hidayah ke jalan yang betul (lurus)." **Aali `Imran: 101**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai iman dengan katanya: "lalah engkau bersaksi keawalanmu dengan keawalanNya, keakhiranmu dengan keakhiranNya, kezahiranmu dengan kezahiranNya, kebatinanmu dengan kebatinanNya.

هُوَ الْأَوَّلُ وَالْآخِرُ وَالظَّاهِرُ وَالْبَاطِنُ وَهُوَ بِكُلِّ شَيْءٍ عَلِيمٌ

"Dialah yang Awal dan yang Akhir; Dialah yang Zahir dan yang Batin; dan Dia lah yang Maha Mengetahui akan tiap-tiap sesuatu."

Al-Hadid: 3

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: "Lima perkara ini jika tidak ada sedikit pun darinya pada diri seseorang maka tiadalah iman baginya: (1) Pasrah kepada ketentuan Allah (2) Redho dengan keputusan Allah (3) Berserah kepada perintah Allah (4) Tawakkal kepada Allah (5) Sabar ketika kejutan pertama.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai Islam: "Islam itu dengan mentahqiq syukur kepada Allah lalu Allah pun mensyukurimu, dan tiada Islam dengan kemunafikan lalu manusia mensyukurimu.

"Jika Islam yang begini (yang disertai kemunafikan) tiada kebaikan padanya maka orang yang begini Islamnya adalah tercela di dunia dan akan diazab di hari kemudian jika tidak ditaubatkan Allah. Firman Allah Taala:

لِيَجْزِيَ اللَّهُ الصَّادِقِينَ بِصِدْقِهِمْ وَيُعَذِّبَ الْمُنَافِقِينَ إِنْ شَاءَ أَوْ يَتُوبَ عَلَيْهِمْ.

"...supaya Allah membalas golongan sodiqin (mereka yang

benar) kerana kebenaran mereka, dan menyeksa orang-orang yang munafik jika Dia mengkehendaki, atau Dia menerima taubat mereka..." **Al-Ahzab: 24**

"Islam begini yang zahirnya kemunafikan adalah lebih buruk dari sikap marah dengan ketentuan Allah dan gelisah. Sesungguhnya penyakit marah dan kegelisahan itu menjadi maksiat di sisi Allah. Kita mohon taubat kepada Allah darinya.

"Manakala penyakit munafik dalam Islam pula akan mendatangkan kemunafikan, orang itu akan disaksikan dengan kemunafikan dan sedikitlah yang dapat bertaubat darinya, Allah jua yang Maha Mengetahui itu darinya

فَأَعْقَبَهُمْ نِفَاقًا فِي قُلُوبِهِمْ إِلَى يَوْمِ يَلْقَوْنَهُ بِمَا أَخْلَفُوا اللَّهَ مَا وَعَدُوهُ وَبِمَا كَانُوا
يَكْذِبُونَ

"Akibatnya Allah menimbulkan kemunafikan dalam hati mereka (berkekalan) hingga ke masa mereka menemui Allah, kerana mereka telah memungkirkan apa yang mereka janjikan kepada Allah dan juga kerana mereka sentiasa berdusta." **At-Taubah: 77**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai tauhid dengan katanya: "Tauhid adalah rahsia Allah, as-sidq (kejujuran) adalah pedang Allah, madad pedang ini adalah Bismillah, terjemahannya adalah

مَا شَاءَ اللَّهُ كَانَ وَمَا لَمْ يَشَأْ لَمْ يَكُنْ وَلَا حَوْلَ وَلَا قُوَّةَ إِلَّا بِاللَّهِ.

"Apa yang dikehendaki oleh Allah berlaku, apa yang tidak dikehendaki Allah tidak berlaku, tiada daya dan upaya melainkan dengan Allah yang Maha Tinggi lagi Maha Agung."

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ bercerita: "Aku punya seorang teman yang selalu datang kepadaku membicarakan tauhid. [Satu hari] aku melihatnya di dalam mimpi, lalu aku berkata



Bekalan Murid Ke Jalan Akhirat

kepadanya: “Wahai bapak Abdullah, jika engkau mengkehendaki yang tiada celaan padanya maka hendaklah farq (pemisahan) pada lisanmu tetap ada, dan jam`u (himpunan) pada sirrmu tetap syuhud (disaksikan).”

Lihatlah, renungilah, fikirkanlah dan kenalilah apakah dia tauhid itu... apakah ia yang diajarkan di madrasah, masjid dan universiti???

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Pintu-pintu Allah yang Maha Benar Subhanahu wa Taala ada empat: (1) Tauhid (2) Mahabbah (3) Iman (4) Redho.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Di dalam mimpi ada suara berkata kepadaku: “Barangsiapa bergantung kepada asma’ Allah dari sudut penamaannya maka syiriklah tempatnya, lalu bagaimana pula dengan orang yang bergantung dengan nama-namanya sendiri?

“Manakah engkau dari tauhid yang haqq yang sunyi dari sebarang ketergantungan (kepentingan) dengan Allah dan dengan makhluk? Setiap isim [yang diamalkan] untuk mendatangkan suatu nikmat atau menolak suatu bencana adalah menghijab dari ZatNya dan dari mentauhidkan sifatNya.

“Hamba yang diliputi oleh satu sifat dari sifatNya, nescaya sifat akan mendorong diri si hamba untuk meminta tolong dengan asma’ dan sifat.

“Dan janganlah engkau meninggalkan bahagianmu kepada yang bukan bahagianmu, lagi janganlah engkau mengungkit kurniaan Allah yang dilebihkanNya kepada selainmu.

“Hendaklah pasrah dan kabul terhadap apa yang datang [dariNya] menjadi `ubudiyyahmu, lagi engkau baik sangka dengan Allah atas apa yang berlaku kepadamu, dan hendaklah engkau menyibukkan diri dengan apa yang lebih utama bagi dirimu

ذَلِكَ الدِّينُ الْقَيِّمُ وَلَكِنَّ أَكْثَرَ النَّاسِ لَا يَعْلَمُونَ.

“...yang demikian itulah agama yang benar, tetapi kebanyakan manusia tidak mengetahui.” Saiyidina Yusuf: 40

“Untaian bicara di atas adalah untuk mereka yang menjadi ahli di berbagai tingkatan martabat, maqam, darjat dan ahwal. Bukan untuk mereka yang masih menjadi ahli pertukangan, usaha dengan gerak dan kata maka mereka sekalian adalah terasing dari bicara tadi. Ahli pertukangan dan usaha ini kembali kepada had mereka dan pahala amalan mereka dari Allah akan sampai kepada mereka tanpa dikurangkan. Ini jika mereka selamat dari gugatan, mengambil kelazatan dengan solat dan puasa, mengecap nikmat dengan renung pandangan ketika menunduk kepala dan menyibukkan diri dengan amalan zikir.

“Sesungguhnya jenayah golongan ini dengan segala tambahan dan melihat kepada ketaatan adalah lebih banyak dari jenayah mereka pada segala maksiat dan banyak melanggar syarak. Cukuplah bagi mereka segala ketaatan kelihatan dari mereka, dan termustajabnya doa-doa, dan bersegera kepada kebaikan.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Barangsiapa yang menjaga diri dari syirik pada tauhid dan mahabbah di awal-awal langkahnya nescaya berazam Allah memberi padanya madad yang mulia di akhir-akhir kurnia kepadanya. Kemudian dia takkan terhibab dari Allah dan takkan masuk kecacatan pada segala kezamannya.

“Barangsiapa yang lewat pada perkara ini dalam langkah yang paling nahas, kecenderungan mendorongnya kepada peribadi syahwat, nescaya lambatlah madad datang kepadanya atas kadar waktu-waktu senggang. Ini keterangan dari Allah

هَذَا بَيَانٌ لِلنَّاسِ وَهُدًى وَمَوْعِظَةٌ لِّلْمُتَّقِينَ

“Ini ialah penerangan kepada seluruh umat manusia, dan petunjuk serta pengajaran bagi orang-orang yang bertaqwa.” Aali `Imran:

138



buat mereka yang sedar dari kealpaan

وَنَفْسٍ وَمَا سَوَّاهَا .. فَأَلْهَمَهَا فُجُورَهَا وَتَقْوَاهَا

“Demi diri manusia dan yang menyempurnakan kejadiannya (dengan kelengkapan yang sesuai dengan keadaannya). Serta mengilhamkannya (untuk mengenal) jalan yang membawanya kepada kejahatan, dan yang membawanya kepada bertaqwa.” As-Syams: 7-8

“Maka bertaqwalah engkau kepada Allah dari jebakan syirik dalam tauhid. Hendaklah engkau bersama Allah, jangan engkau berpisah darinya dengan kurang atau lebih (hendaklah engkau bersama Allah waktu senang dan susah). Jangan sekali-kali engkau terjebak pada syirik dalam mahabbah dengan kecenderungan kepada syahwat... tidak kira syahwat apa pun.

“Barangsiapa yang takut dan malu kepada Allah, lagi menghargai Allah dalam nikmatNya, nescaya dia akan berada dalam keamanan Allah yang akan menolakkan darinya bala yang besar. Dalil kenyataan ini dari hadis Saiyidina wa Maulana junjungan Nabi ﷺ:

مَنْ كَانَ لِلَّهِ فِي الرَّخَاءِ فَإِنَّ اللَّهَ لَهُ فِي الشَّدَّةِ.

“Barangsiapa yang setia dengan Allah di saat senang sesungguhnya Allah akan membelanya di saat kesusahan.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Wahai manusia! Berniagalah kamu agar beroleh keuntungan. Awaslah! Jangan sampai kamu berniaga lalu rugi hingga buruk keadaanmu. Adapun peniaga itu hamba yang beribadat kepada Allah dengan hakikat-hakikat tauhid dan iman. Yang beruntung ialah hamba yang menguntungkan dirinya dengan membersihkan jiwa dari syirik dan kekufuran.

قُلْ إِنِّي أُمِرْتُ أَنْ أَعْبُدَ اللَّهَ مُخْلِصًا لَهُ الدِّينَ .. وَأُمِرْتُ لِأَنْ أَكُونَ أَوَّلَ الْمُسْلِمِينَ

.. قُلْ إِنِّي أَخَافُ أَنْ عَصَيْتُ رَبِّي عَذَابَ يَوْمٍ عَظِيمٍ .. قُلِ اللَّهُ أَعْبُدْ مُخْلِصًا لَهُ دِينِي ..
 .. فَاعْبُدُوا مَا شِئْتُمْ مِنْ دُونِهِ قُلْ إِنَّ الْخَاسِرِينَ الَّذِينَ خَسِرُوا أَنْفُسَهُمْ وَأَهْلِيهِمْ
 يَوْمَ الْقِيَامَةِ أَلَا ذَلِكَ هُوَ الْخُسْرَانُ الْمُبِينُ.

*"Katakanlah (wahai Muhammad): "Sesungguhnya aku diperintahkan supaya menyembah Allah dengan mengikhlaskan segala ibadat kepadanya. Dan aku diperintahkan supaya menjadi orang yang awal berserah diri bulat-bulat (kepada Allah)." Katakanlah lagi: "Sesungguhnya aku takut - jika aku menderhaka kepada Tuhanku - akan azab hari yang besar (soal jawabnya)." Katakanlah lagi: "Allah jualah yang aku sembah dengan mengikhlaskan amalan ugamaku kepadaNya. (Setelah kamu mengetahui pendirianku ini wahai kaum musyrik, dan kamu masih juga berdegil) maka sembahlah kamu apa yang kamu kehendaki, yang lain dari Allah, (kamu akan mengetahui akibatnya)." Katakanlah lagi: "Sesungguhnya orang-orang yang rugi (dengan sebenar-benarnya) ialah mereka yang merugikan dirinya sendiri dan pengikut-pengikutnya pada hari kiamat (dengan sebab perbuatan mereka memilih kekufuran atau kederhakaan). ingatlah, yang demikian itulah kerugian yang jelas nyata." **Az-Zumar: 11-15***

"Keluargamu adalah Adam dan Hawa, Nuh dan Ibrahim, Musa dan Isa, Muhammad ﷺ dan isteri-isterinya

النَّبِيُّ أَوْلَىٰ بِالْمُؤْمِنِينَ مِنْ أَنْفُسِهِمْ وَأَزْوَاجُهُ أُمَّهَاتُهُمْ.

*"Baginda Nabi itu lebih menolong dan lebih menjaga kebajikan orang-orang yang beriman daripada diri mereka sendiri; dan isteri-isteri Baginda adalah menjadi ibu mereka...." **Al-Ahzaab: 6***

إِنَّ أَوْلَى النَّاسِ بِإِبْرَاهِيمَ لِلَّذِينَ اتَّبَعُوهُ وَهَذَا النَّبِيُّ وَالَّذِينَ آمَنُوا وَاللَّهُ وَلِيُّ الْمُؤْمِنِينَ.



“Sesungguhnya mereka yang hampir sekali kepada Nabi Ibrahim (dan berhak mewarisi ugamanya) adalah orang-orang yang mengikutinya dan juga Nabi (Muhammad) ini serta orang-orang yang beriman (umatnya - umat Islam). Dan (ingatlah), Allah ialah pelindung dan penolong sekalian mereka yang beriman.” Aali `Imran: 68

“Orang yang merugi adalah hamba yang mensyirikkan Allah dalam tauhidnya

لَئِنْ أَشْرَكْتَ لَيَحْبَطَنَّ عَمَلُكَ وَلَتَكُونَنَّ مِنَ الْخَاسِرِينَ.

“Demi sesungguhnya! jika engkau mempersekutukan (sesuatu yang lain dengan Allah) tentulah akan gugur amalmu, dan engkau akan tetap menjadi dari orang-orang yang rugi” Az-Zumar: 65

“...begitu juga rugilah orang yang mensyirikkan Allah Tuhannya dengan suatu apa atau dengan satu makhlukNya dalam ibadah

وَاعْبُدُوا اللَّهَ وَلَا تُشْرِكُوا بِهِ شَيْئًا.

“Dan hendaklah kamu ibadat kepada Allah dan janganlah kamu sekutukan Dia dengan sesuatu apa jua....” Aali `Imran: 36

فَمَنْ كَانَ يَرْجُوا لِقَاءَ رَبِّهِ فَلْيَعْمَلْ عَمَلًا صَالِحًا وَلَا يُشْرِكْ بِعِبَادَةِ رَبِّهِ أَحَدًا

“...oleh itu, sesiapa yang percaya dan berharap akan pertemuan dengan Tuhannya, hendaklah dia mengerjakan amal yang soleh dan janganlah dia mempersekutukan sesiapa pun dalam ibadatnya kepada Tuhannya”. Al-Kahf: 110

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Jika Allah memuliakan seorang hambaNya pada gerak dan diam si hamba nescaya Allah akan menegakkan baginya (memuliakannya, memberinya taufik, menolongnya, mendorongnya dan menyentapnya kepada) `ubudiyyah kepada Allah. Allah akan melindunginya dari

kepentingan nafsunya dan Allah akan menjadikannya berbolak-balik dalam `ubudiyyah kepadaNya.

“Segala kepentingan nafsu akan terlindung dari hamba ini serentak dengan perjalanan takdirnya dan dia sendiri tidak berpaling kepada kepentingan itu. Seolah-olah si hamba ini terasing dan sibuk darinya. Ini merupakan satu pintu dari kewalian.

“Dan jika Allah menghinakan seorang hamba pada gerak dan diamnya nescaya Allah menegakkan bagi si hamba kepentingan nafsunya. Allah akan menutup dari si hamba `ubudiyyah kepadaNya. Dia pun berbolak-balik dalam syahwatnya. `Ubudiyyah kepada Allah asing darinya walau pun secara zahir berlaku juga pada si hamba hukum hakam `ubudiyyah. Ini merupakan satu pintu dari penghinaan.

“Adapun tingkatan as-siddiqiyyah al-uzhma (kejujuran agung) dan al-wilayah al-kubro (kewalian terbesar) maka segala kepentingan dan hak di sisi mereka yang punya pandangan mata hati adalah sama belaka. Kerana dia mengambil dan meninggalkan dengan Allah semata-mata.”

Wahai Tuhan yang Maha Sejahtera lagi Maha Memberi Petunjuk, berilah kami petunjuk. Wahai Tuhan yang Maha Menjaga, jagalah kami. Wahai Tuhan yang Maha Berbudi, berbudilah kepada kami. Wahai Tuhan yang Maha Santun, santunilah kami. Wahai Tuhan yang maha menutup kelemahan, tutuplah kelemahan kami.

Segala pujian bagi Allah, segala kesyukuran bagi Allah atas nikmat-nikmatNya yang tidak terkira. Muliakanlah kami dengan tareqat yang penuh keberkatan ini tanpa daya dan upaya dari kami. Jadikanlah kami para khadam tareqat ini, jadikanlah kami khadam kepada para khadam tareqat ini. Allahumma Robbana dan redhoilah beliau yang membawakan kepada kami sirr tareqat ini; Saiyidina As-Syarif Al-Hasani As-Syeikh Al-Kamil Abdun Nasir Al-Masyisyi Al-Fasi Al-Khoyri As-Setifi Al-Jaza`iri Al-Madani Al-Makki As-Syazili. Allahumma amin ya Robbal Alamin.



Bab 49

KEWALIAN DAN MAHABBAH

Pernyataan paling indah diungkapkan sebelum *al-fath al-akbar* (pembukaan terbesar), *al-wishal al-a'zhom* (hubungan teragung) dan *al-wushul al-akmal* (capaian paling sempurna) ialah: (1) Hati dalam kebimbangan (2) Jiwa terbakar (3) Tidak tahu mengapa ketenangan dicabut dariku dan (4) Mengapa wajahku pucat.

أَمْ حَسِبْتُمْ أَنْ تَدْخُلُوا الْجَنَّةَ وَلَمَّا يَأْتِكُمْ مَثَلُ الَّذِينَ خَلَوْا مِنْ قَبْلِكُمْ مَسَّتْهُمُ
الْبَأْسَاءُ وَالضَّرَاءُ وَرَزِلْوا حَتَّى يَقُولَ الرَّسُولُ وَالَّذِينَ آمَنُوا مَعَهُ مَتَى نَصُرُ اللَّهُ أَلَا
إِنَّ نَصْرَ اللَّهِ قَرِيبٌ.

"Apakah patut kamu menyangka bahawa kamu akan masuk syurga, padahal belum sampai kepada kamu (ujian dan cubaan) seperti yang telah berlaku kepada mereka yang terdahulu daripada kamu? Mereka telah ditimpa kepapaan (kemusnahan hartabenda) dan serangan penyakit, serta digoncangkan (oleh ancaman bahaya musuh), sehingga berkatalah Rasul dan orang-orang yang beriman bersamanya: Bilakah (datangnya) pertolongan Allah?" Ketahuilah sesungguhnya pertolongan Allah itu dekat". Al-Baqarah: 214

Kita teruskan lagi dalam siri ini dengan bicara pada topik kewalian dan mahabbah. Kedua-dua topik ini amat sulit dan penting.

Atas faktor tersebut artikel kali ini gaya bahasanya tegas, isyaratnya tinggi, makna-maknanya menakjubkan dan simple serta simboliknya jelas. Dengan itu hendaklah adab menjadi syiar dan cirimu pada apa yang engkau fahami dan yang tidak engkau fahami.

Saiyidina As-Syeikh Al-Kamil As-Syazili رَضِيَ اللهُ عَنْهُ وَأَرْضَاهُ berkata: “Seorang wali dijaga pada empat tempat: (1) Lintasan dan waswas dalam solat (2) Waktu doa (3) Bersuaka kepada Allah dan lari kepada Allah (4) Ketika turun bencana dan ketika dilepaskan darinya.

“Pada tempat-tempat ini tidak terlintas pada hati para wali dan tiada pergantungan mereka melainkan Allah Azza wa Jalla.

“Hati mereka terkawal dan dijaga melainkan dari empat perkara: (1) Dari Akhirat dan lawannya (2) Dari sebutan para awliya’ dan lawan-lawan mereka (3) Dari sebutan ketaatan dan lawan-lawannya (4) Dari hakikat keimanan dan lawan-lawannya.

“Hati mereka dijaga dari segala lintasan melainkan dari yang empat tadi kerana padanya terdapat berbagai faedah kegunaan pada `ubudiyyah sejati ketika bangkit dari yang lawan. Bagaimana tidak begitu sedang dalam risalah Tuhan kita kepada junjungan Nabi Saiyidina wa Maulana Muhammad صَلَّى اللهُ عَلَيْهِ وَسَلَّمَ penuh dengan sebutan itu semua?. Maka tiada bantahan pada menolak sesuatu dari bab ini. Berikanlah adab haknya pada apa yang terlintas di hatimu. Dan berpegang teguhlah kamu kepada Allah

فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ.

“Maka hendaklah engkau bertawakkal kepada Allahm sesungguhnya Allah mencintai mereka yang bertawakkal kepadaNya.” Aali `Imran: 159

“Dan hendaklah engkau bertaqwa di tiga persinggahan: (1) Taqwa pada azam (2) Taqwa pada keperluan (3) Taqwa pada pertukaran dalam ehwal dan tempat.

Adapun tawakkal itu kepala amalan dan zuhud merupakan asasnya.



“Tafsir taqwa pada azam ialah engkau berazam pada kebaikan untuk melaksanakannya, dan engkau berazam pada kejahatan untuk tidak melakukannya. Kemudian itu menjadikan engkau di waktu lain memperbaharui taqwa untuk melaksanakan seperti yang engkau azamkan dan meninggalkan seperti yang engkau azamkan.

“Kemudian engkau didatangi ahwal pada zahir dan batinmu. Pada zahir seperti kemuliaan dan kehinaan, kekayaan dan kefakiran, sihat dan sakit, nasib malang dan nikmat atau lain-lain hal. Pada batinnya seperti kesempitan dan kelapangan, takut dan harap dan lain-lain. Begitu juga sombong dan tawadhu’, takut ditimpa kefakiran dan aman darinya dan berbagai lagi hal yang saling berlawanan.

“Maka hendaklah kamu memberi hak taqwa pada segala ehwal dan sifat dengan perpindahan dari negeri ke negeri, dari tempat ke tempat dan lain-lain. Dan renungilah firman Allah Tabaroka wa Taala

وَمَنْ يَتَّقِ اللَّهَ يَجْعَلْ لَهُ مَخْرَجًا.

“...dan barangsiapa yang bertaqwa kepada Allah nescaya Allah akan mengadakan baginya jalan keluar (dari segala perkara yang menyusahkannya)” **At-Thalaq: 2**

وَمَنْ يَتَّقِ اللَّهَ يَجْعَلْ لَهُ مِنْ أَمْرِهِ يُسْرًا.

“...dan (ingatlah), sesiapa yang bertaqwa kepada Allah, nescaya Allah memudahkan baginya segala urusannya.” **At-Thalaq: 4**

وَمَنْ يَتَّقِ اللَّهَ يَكْفُرْ عَنْهُ سَيِّئَاتِهِ وَيُعْظِمْ لَهُ أَجْرًا.

“...dan (ingatlah), sesiapa yang bertaqwa kepada Allah, nescaya Allah menghapuskan kesalahan-kesalahannya, dan akan membesarkan pahala balasannya.” **At-Thalaq: 5**

...lalu engkau lakukanlah dengan faham, letakkan setiap taqwa

di kedudukannya nescaya engkau akan melihat segala keajaiban dan rahsia Allah.

وَمَنْ يَتَوَكَّلْ عَلَى اللَّهِ فَهُوَ حَسْبُهُ

“...dan (ingatlah), sesiapa berserah diri bulat-bulat kepada Allah, maka Allah cukuplah baginya (untuk menolong dan menyelamatkannya).” **At-Thalaq: 3**

“Barangsiapa yang zuhud terhadap dunia nescaya dia dicintai Allah dan, barangsiapa dicintai Allah nescaya Allah akan mencukupkannya dan menjaganya. Allah akan meletakkannya dalam lindungan Allah, keamanan Allah, perwakilan Allah dan pertahanan Allah.

وَمَنْ يَعْشُ عَنْ ذِكْرِ الرَّحْمَنِ...

“Dan barangsiapa yang tidak mengendahkan zikir kepada Allah yang Maha Rahman (tidak ingat Allah)...

...senafas atau dua nafas...

نُقِضَ لَهُ شَيْطَانًا فَهُوَ لَهُ قَرِينٌ .. وَإِنَّهُمْ لَيُصَّدُّونَهُمْ عَنِ السَّبِيلِ وَيَحْسَبُونَ أَنَّهُمْ مُّهْتَدُونَ.

...Kami akan adakan baginya syaitan (yang menghasut dan menyesatkannya), lalu menjadilah syaitan itu temannya yang tidak renggang daripadanya. Dan sesungguhnya syaitan-syaitan itu tetap menghalangi mereka dari jalan yang benar, sedang mereka menyangka bahawa mereka orang-orang yang mendapat hidayah petunjuk.” **Az-Zukhruf: 36-37**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Ukurlah dirimu dan timbanglah ia dengan solat, dengan penerimaan manusia kepadamu, dengan penolakan mereka kepadamu, dengan faqd (kehilangan) dan wajd (perolehan) dalam segala ahwal yang zahir



dan batin.

“Jika terlintas dalam benakmu sesuatu yang engkau senangi, atau engkau gembira dengannya, atau engkau sedih kerananya, atau engkau berbimbang-bimbang terhadapnya... maka hal yang demikian adalah keaiban yang menggugurkan engkau dari *al-wilayatul kubro* (kewalian terbesar) dan *as-siddiqiyyatul uzhma* (kejujuran teragung).

“Mudah-mudahan saja engkau diperuntukkan *al-wilayatus sughro* (kewalian kecil) dalam berbagai darjat iman dan amal yang bertambah-tambah. [Cuma pada tahap ini] takkan ada hentinya waswas dan segala macam lintasan kerana engkau masih lagi di langit dunia, dekat dengan syaitan dan hawa nafsu. Mereka mencuri-curi dengan, melempar bisikan dan berkata-kata menggodamu. Jika engkau didokong oleh bintang-bintang ilmu dan keyakinan berserta dengan penjagaan yang berterusan maka sesungguhnya telah sempurnalah kewalianmu pada bab ini. Jika tidak begitu keadaanmu maka sesungguhnya engkau asyik berbolak balik, terkadang menang terkadang kalah, bergantung kepada keadaanmu, dan bagimu ganjaran pahala mereka yang berjuang fi sabilillah. Wassalam.

Saiyidina As-Syeikh Al-Kamil As-Syazili رَضِيَ اللهُ عَنْهُ وَأَرْضَاهُ berkata: “Demi beroleh kurniaan Allah maka hendaklah engkau: (1) Redho dengan ketentuan qodho’ (2) Sabar ketika turunnya bala (3) Bertawakkal kepada Allah di saat kesulitan (4) Kembali kepada Allah dalam bencana.

“Barangsiapa yang keluar baginya empat perkara ini dari khazanah amalan di atas hamparan mujahadah, mengikut sunnah dan menjejak perjalanan para imam maka sesungguhnya telah sah kewalian (persetiaan)nya kepada Allah, kepada RasulNya dan kepada orang-orang beriman

وَمَنْ يَتَوَلَّى اللَّهَ وَرَسُولَهُ وَالَّذِينَ آمَنُوا فَإِنَّ حِزْبَ اللَّهِ هُمُ الْغَالِبُونَ.

“Dan sesiapa yang menjadikan Allah dan RasulNya serta orang-orang yang beriman itu penolongnya (maka berjayalah dia), kerana Sesungguhnya golongan (yang berpegang kepada ugama) Allah,

itulah yang tetap menang.” **Al-Ma`idah: 56**

“Barangsiapa yang keluar baginya kurnia dari khazanah budi ini di atas hamparan mahabbah maka sesungguhnya telah sempurnalah pembelaan (kewalian) dari Allah buatnya berdasarkan firman Allah Tabaroka wa Taala

وَهُوَ يَتَوَلَّى الصَّالِحِينَ.

“...dan Dia lah yang membela orang-orang yang soleh.”

“Ada bezanya antara dua kewalian: (1) Hamba yang berwali (bersetia) kepada Allah (2) Hamba yang Allah menjadi walinya. Dua kewalian; kecil dan besar. Engkau berwali kepada Allah itu terbit dari mujahadah. Engkau berwali kepada RasulNya itu terbit dari mengikut sunnah. Engkau berwali kepada kaum mukminin itu terbit dari menteladani para imam. Fahamilah nescaya engkau beruntung”.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Seorang wali itu akan mencapai satu kedudukan yang dikatakan di situ kepadanya: Kami menyertakan keselamatan bersamamu dan Kami gugurkan darimu teguran. Silakanlah melakukan apa yang engkau mahu”. (Fahamilah dan percayalah, jika engkau tidak mampu untuk melakukan itu maka janganlah membangkang dan jangan mendustai).

Ini adalah maqam tokoh-tokoh besar kalangan masyaikh yang kamil (bukan untuk yang belum mencapai tahap mereka... tidak kira siapa menyukai atau tidak) -moga Allah meredhoi mereka dan menyampaikan keredhoan buat mereka sekalian- selepas mereka diciptakan dan dipilih, selepas mereka berjihad dan bersungguh-sungguh, selepas mereka berhijrah dan memperjuangkan, selepas mereka berteguh diri kerana Allah dan berpegang teguh kepada Allah lalu mereka dimenangkan...

كُونُوا رَبَّانِيِّينَ

"Hendaklah kamu menjadi mereka yang robbani (yang hanya untuk



Allah)...” **Aali `Imran: 79**

...dan seperti yang disebut dalam hadis qudsi:

... فَإِذَا أَحْبَبْتَهُ كُنْتُ سَمْعَهُ الَّذِي يَسْمَعُ بِهِ. وَبَصَرَهُ الَّذِي يُبْصِرُ بِهِ. وَيَدَهُ الَّتِي يَبْطِشُ بِهَا. وَرِجْلَهُ الَّتِي يَمْشِي بِهَا...

“...maka apabila Aku mencintainya jadilah aku pendengarannya yang dengannya dia mendengar, jadilah aku pengelihatannya yang dengannya dia melihat, jadilah aku tangannya yang dengannya dia bertindak, jadilah aku kakinya yang dengannya dia berjalan...”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ menghidayatkan bicara mahaguru dan syeikhnya Saiyidina As-Syeikh Abdus Salam Ibnu Masyish رَضِيَ اللَّهُ عَنْهُ وَأَرْضَاهُ mengenai mahabbah : “Lazimilah keadaan suci dari syirik... setiap kali berhadad maka hendaklah engkau bersuci

لَا تُشْرِكْ بِي شَيْئًا...

“...janganlah engkau mensyirikkan Aku dengan suatu apa pun...”

Al-Hajj: 26

Begitu jua dari kotoran cinta dunia tiap kali engkau condong kepada syahwat maka pulihkanlah dengan taubat apa-apa yang telah engkau rosakkan dengan hawa atau engkau kotorkan.

Hendaklah engkau mencapai mahabbah Allah dengan sikap membesarkan dan kemurnian. Hendaklah engkau ketagih minum dengan gelas mahabbah Allah disertai mabuk (*ghaibah* = hilang) dan sohwun (jaga dan hadir jiwa), tiap kali engkau sedar atau bangun engkau minum lagi mahabbah Allah hinggalah kemabukanmu (keghaibanmu) dan kejagaanmu itu dengan Allah Subhanahu wa Taala.

“Dan sehingga engkau ghaib dengan keindahanNya dari mahabbah, dari minuman, dari minum dan dari gelas kerana apa yang

terbit kepadamu dari cahaya keindahanNya dan kudus kesempurnaan jalalNya.

“Boleh jadi ada orang yang tidak tahu apa itu mahabbah, tidak mengerti minum dan minuman, gelas, jaga dan mabuk... tiba-tiba dia ditanya: Baiklah! Entah berapa ramai orang karam dalam sesuatu tidak tahu dia sedang karam?! Silakanlah tuan memberitahu kepadaku dan menyedarkan aku dari kejahilanku... atau ertikanlah kepadaku kurnia yang diberiNya kepadaku sedangkan aku alpa darinya”.

Aku berkata kepadamu: “Benar, itulah mahabbah. Ia diambil dari Allah oleh hati pecinta dengan apa yang disingkapkan kepadanya dari cahaya keindahanNya dan kudus kesempurnaan jalalNya.

Dan minuman mahabbah adalah adunan sifat dengan sifat, akhlak dengan akhlak, perbuatan dengan perbuatan, nur dengan nur, asma’ dengan asma’, ciri dengan ciri... ia dapat dipandang bagi siapa yang dikehendaki Allah Azza wa Jalla.

“Adapun minum itu adalah tuangan hati, sifat dan akar dari minuman ini hingga engkau mabuk. Minuman itu diambil secara berperingkat selepas proses peleburan dan pemurnian.

“Maka tiap orang akan dituang dengan kadarnya; (1) Ada yang dituang tanpa perantara dan Allah Subhanahu wa Taala menangani perkara ini untuknya. (2) ada yang dituang dari pihak perantara dengan perantara seperti malaikat, ulama, dan tokoh-tokoh besar kalangan muqorrobin. (3) Ada yang mabuk dengan syuhud pada gelas sedangkan dia masih belum meneguk apa-apa, lalu apa agakanmu jika dia telah zauq, telah minum, telah puas, telah mabuk dan telah menikmati minuman itu.

“Kemudian dari itu sedar (selepas mabuk) dengan kadar yang berbeza-beza, sama seperti halnya mabuk.

“Ada pun gelas merupakan makrifat Al-Haqq Subhanahu wa Taala. Ada kalangan hambaNya yang dikehendakiNya dan yang terpilih apabila meneguk minuman yang suci, murni dan bening dengan



Bekalan Murid Ke Jalan Akhirat

makrifat itu akan beroleh musyahadah yang berbeza-beza. (1) Terkadang yang minum akan musyahadah gelas itu sebagai satu bentuk. (2) Terkadang dia musyahadahnya sebagai satu makna. (3) Terkadang dia musyahadahnya sebagai satu ilmu.

Maka bentuk adalah bahagian untuk badan dan diri.

Makna adalah bahagian untuk hati dan akal.

Ilmu adalah bahagian untuk roh dan sirr.

Aduhai betapa heningnya minuman itu, alangkah bertuahnya siapa yang telah meneguknya dan terus meminumnya lagi tidak putus darinya. Maka mintalah kepda Allah dari kurniaNya:

ذَلِكَ فَضْلُ اللَّهِ يُؤْتِيهِ مَنْ يَشَاءُ وَاللَّهُ وَاسِعٌ عَلِيمٌ.

«Sesungguhnya limpah kurnia itu adalah di tangan Allah, diberikanNya kepada sesiapa yang dikehendakiNya; dan Allah Maha Luas limpah kurniaNya, lagi meliputi pengetahuanNya.” **Aali `Imran: 73**

“Terkadang berkumpul sekelompok muhibbin (pecinta) lalu mereka bersama-sama dituang minuman dari satu gelas. Atau mereka dituang minuman dan banyak gelas. Terkadang ada dari kalangan mereka yang dituang kepadanya minuman dari satu gelas, atau dari banyak gelas... jenis minuman juga terkadang berbagai-bagai mengikut bilangan gelas yang diedarkan. Terkadang dituang dari satu gelas tapi rasa minumannya berbeza-beza seramai bilangan pecinta yang meneguk darinya.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ ditanya orang; apa itu mahabbah?. -Moga Allah meredhoi beliau dan mencapaikan keredhoannya dan semoga Allah mengurnia kita kemanfaatan dengannya-, maka beliau berkata: “Mahabbah adalah satu ambilan dari Allah kepada hati hambaNya dari segala yang selainNya. Lalu

dari situ engkau mendapati jiwa jadi;

Cenderung untuk mentaati Allah.

Akal terbenteng teguh dengan makrifat Allah Tabaroka wa Taala.

Roh diambil ke hadrat Allah Subhanahu wa Taala.

Sirr tenggelam dalam musyahadah Allah Tabaroka wa Taala.

“...dan si hamba pula meminta tambahan lalu dia dikurnia tambahan. Dia menuntut pembukaan futeh lalu dibukakan untuknya dari keheningan lazat munajatNya seterusnya dipakaikan si hamba itu dengan persalinan dampingan di atas hamparan kedekatan. Dia menyentuh gugusan hakikat yang dara dan ilmu-ilmu yang masak ranumnya. Lalu kerana yang demikian itu mereka berkata: “Wali-wali Allah ibarat para pengantin Allah yang Maha Rahman Subhanahu wa Taala. Para penjenayah takkan dapat melihat kepada pengantin.

Lalu ada orang berkata kepada beliau: “Sekarang telah ku tahu cinta itu, lalu apakah minuman cinta? Apakah gelas cinta? Apakah penuang minuman? Apakah rasa zauq itu? Minuman seperti apakah itu? Puas seperti apakah dari minuman itu? Mabuk apakah itu dan apa pula sedar dari kemabukan itu?

Maka Saiyidina As-Syeikh berkata: “Baiklah, ku jawab persoalanmu itu.

Minuman : Adalah cahaya terpancar dari keindahan Al-Mahbub (yang Maha Dicintai) Subhanahu wa Taala.

Gelas : Adalah kelembutan yang menyampaikan cahaya itu ke mulut hati sanubari.

Penuang Minuman : Adalah Dia yang menangani hidangan minuman itu kepada al-makhshus al-akbar (pilihan yang terbesar) dan golongan solihin di kalangan hambaNya. Dialah Allah yang Maha `Alim segala sukatan dan segala kepentingan para kekasihNya.

“Lalu siapa yang disingkapkan baginya keindahan itu dan beroleh darinya barang senafas dua kemudian dilabuhkan tirai hijab ke atasnya



Bekalan Murid Ke Jalan Akhirat

maka dialah hamba yang beroleh rasa zauq dan menjadi perindu.

“Siapa yang dikekalkan memandang keindahan itu barang sejam dua maka benar-benarlah dia peminumnya.

“Siapa yang ditangani untuknya urusan ini dan dikekalkan minuman baginya hingga mengalir dan memenuhi urat saraf dan sendi-sendinya dengan khazanah cahaya Allah maka yang demikian itulah kepuasan dari minuman itu.

“Bolah jadi minuman itu menghaibkan dirinya dari pancaindera dan yang tercapai akal hingga dirinya tidak tahu apa yang diperkatakan dan apa yang dia katakan, maka yang demikian itulah mabuk.

“Bolah jadi diedarkan kepada mereka gelas-gelas yang banyak dan hal mereka satu sama lain berbeza-beza. Mereka mendatangi zikir dan ketaatan. Mereka tidak terhibat dari sifat-sifat walaupun dengan bersesak-sesaknya segala takdir yang diputuskan. Maka yang demikian itu adalah waktu sedarnya mereka, luas pemandangan mereka dan bertambahnya ilmu mereka. Mereka mendapat petunjuk di malam hari mereka dengan bintang-bintang ilmu dan bulan tauhid. Dengan gugusan mentari berbagai makrifat mereka diterangi di siang hari

أُولَئِكَ حِزْبُ اللَّهِ أَلَا إِنَّ حِزْبَ اللَّهِ هُمُ الْمُفْلِحُونَ.

“Merekalah penyokong-penyokong (ugama) Allah. Ketahuilah! Sesungguhnya penyokong-penyokong (ugama) Allah itu ialah orang-orang yang berjaya.” **Al-Mujadilah: 22**

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata: “Siapa yang mencintai Allah dan cinta kerana Allah sesungguhnya telah sempurnalah kewaliannya. Hakikatnya seorang pecinta itu hatinya tidak tunduk kepada mana-mana kuasa melainkan kepada yang dicintainya, lagi dia tidak punya kemahuan selain kemahuan yang dicintainya itu.

“Apabila telah sabit kewaliannya dari Allah nescaya si hamba takkan merasa tak suka menemuiNya. Yang demikian itu diketahui dari firman Allah Tabaroka wa Taala:

إِنْ رَعَمْتُمْ أَنْكُمْ أَوْلِيَاءَ اللَّهِ مِنْ دُونِ النَّاسِ فَتَمَنَّوْا الْمَوْتَ إِنْ كُنْتُمْ صَادِقِينَ.

“...kalau kamu anggap Bahawa kamulah sahaja awliya’ Allah (orang-orang yang dikasihi Allah) tidak termasuk umat-umat manusia yang lain, maka mintalah hendakkan mati (dengan meminta kepada Allah supaya kamu dimatikan sekarang juga), jika betul kamu orang-orang yang benar!” **Fussilat: 6**

“Maka begitulah seorang wali pada hakikatnya; dia tidak membenci kematian jika ditawarkan kepadanya. Hamba yang tak punya kekasih yang dicinta melainkan Allah sungguh telah cintalah dia kepada Allah. Hamba yang tidak cinta sesuatu kerana hawa nafsunya sungguh dia telah dicintakan Allah. Hamba yang telah merasa zauq dari kemesraan Allah sungguh dia cinta untuk bertemu Allah.

“Cinta kepada Allah Subhanahu wa Taala tersedia untuk kau perolehi pada yang sepuluh ini, maka ambillah iktibar dan pelajaran dalam isinya;

- صَلَّى اللَّهُ عَلَيْهِ وَسَلَّمَ Saiyidina wa Maulana Muhammad Rasulullah
- رَضِيَ اللَّهُ عَنْهُ وَأَرْضَاهُ As-Siddiq Saiyidina Abu Bakar
- رَضِيَ اللَّهُ عَنْهُ وَأَرْضَاهُ Al-Faruq Saiyidina Umar
- Seluruh Ahlul صَلَوةٍ وَالسَّلَامِ عَلَيْهِمْ terutamanya Saiyidina Al-Imam Ali, Saiyidatina Fatimah, Saiyidina Al-Hasan, Saiyidina Al-Husein dan Saiyidatina Zainab.
- Seluruh sahabat رِضْوَانُ اللَّهِ عَلَيْهِمْ وَأَرْضَاهُمْ terutamanya Saiyidina Othman dan baki sepuluh sahabat yang dijamin syurga.
- Para tabi`in رِضْوَانُ اللَّهِ عَلَيْهِمْ أَجْمَعِينَ
- Para awliya’ رِضْوَانُ اللَّهِ عَلَيْهِمْ أَجْمَعِينَ
- Para ulama’ul `amylin yang memberi petunjuk kepada Allah رِضْوَانُ اللَّهِ عَلَيْهِمْ أَجْمَعِينَ
- Para syuhada’ رِضْوَانُ اللَّهِ عَلَيْهِمْ أَجْمَعِينَ
- Para solihin رِضْوَانُ اللَّهِ عَلَيْهِمْ أَجْمَعِينَ, juga para mukminin رِضْوَانُ اللَّهِ عَلَيْهِمْ أَجْمَعِينَ



“Sesungguhnya sesudah iman urusan ini terjurus kepada sepuluh perkara; (1) Sunnah (2) Bid`ah (3) Hidayah (4) Dholalah (kesesatan) (5) Ketaatan (6) Maksiat (7) Keadilan (8) Kezaliman (9) Kebenaran (10) Kebatilan.

“Engkau dapat membezakan, engkau mencintai dan engkau membenci... maka cintailah keranaNya dan bencilah keranaNya jua lalu jangan kau peduli pada apa cinta dan bencimu itu. Terkadang kedua-duanya ada pada diri seseorang dan wajib atasmu melaksanakan hak kedua-dua sifat itu.

“Jika sudah jelas padamu sekarang bahawa cinta kepada Allah itu ada pada sepuluh golongan yang disebut tadi maka tiliklah apakah ada kesan hawa di sana? Demikian maka hendaklah engkau iktibar (bandingkan) cintamu kepada siapa yang hadir dari ikhwanmu yang sodiqin, masyaikh yang solihin, ulama yang memberi petunjuk serta apa saja yang hadir dan siapa saja yang hadir dengan cintamu kepada siapa yang ghaib darimu atau telah mati. Jika engkau mendapati bahawa hatimu tidak bergantung dengan siapa yang hadir seperti tidak bergantungnya dengan siapa yang ghaib atau mati maka sesungguhnya telah bersihlah cintamu dari hawa dan sabitlah cintamu itu kerana Allah Subhanahu wa Taala.

“Jika engkau mendapati ada sesuatu yang hatimu bergantung dengannya pada siapa yang engkau cintai maka rujuklah kepada ilmu... mengajilah... belajarliah dan tekunilah pandangan kepada lima bahagian dari (1) Wajib (2) *Mandub ilaihi* (yang digalakkan melakukannya) (3) Makruh (4) *Mahzur* (yang dilarang) (5) Harus.

Saiyidina As-Syeikh Al-Kamil As-Syazili رَضِيَ اللهُ عَنْهُ وَأَرْضَاهُ berkata: “Mahabbah itu rahsia dalam hati dari kurnia Al-Mahbub. Jika sabit mahabbah itu pada mu nescaya ia akan memutuskanmu dari segala

teman. Haram atasmu berhubung dengan Al-Mahbub sedangkan engkau pada semesta alam ini masih punya teman. Jika Dia menahanmu dari apa yang engkau cintai dan mengembalikanmu kepada apa yang Dia cinta maka itu petanda mahabbah Allah Subhanahu wa Taala kepadamu”.

Alhamdulillah syukur kepada Allah atas kelebihanNya yang melimpah ruah, atas nikmatNya yang besar dan rahmatNya yang luas.



Bab 50

MAKRIFAT & TASAWUF ISLAMI YANG SUNNI

Ada yang mengungkapkan -dan semoga Allah meredhoinya:-

اللَّهُمَّ رَبَّنَا كُنْ وَجْهِي فِي كُلِّ جِهَةٍ. وَمَقْصِدِي فِي كُلِّ قَصْدٍ. وَعَايَتِي فِي كُلِّ سَعْيٍ. وَمَلْجَأِي وَمَلَاذِي فِي كُلِّ شِدَّةٍ وَهَمٍّ وَغَمٍّ وَكَرْبٍ وَضِيقٍ وَمُشْكَلَةٍ. وَوَكِيلِي فِي كُلِّ أَمْرٍ وَمَسْأَلَةٍ. وَتَوَلَّيْنِي تَوَلَّى مَحَبَّةٍ وَعِنَايَةٍ وَرِعَايَةٍ فِي كُلِّ حَالٍ وَمَكَانٍ وَزَمَانٍ.

“Allahumma Robbana jadilah Engkau wajah penghadapanku di tiap arah, jadilah Engkau tujuanku di tiap maksud, jadilah Engkau sasaranku di tiap usaha, jadilah Engkau perlindunganku dan pembelaku di tiap kesulitan, kesedihan, keduakaan, bencana, kesempitan dan musykilah. Jadilah Engkau wakilku di tiap urusan dan masalah. Engkau belalah aku hambaMu dengan pembelaan mahabbah, inayah dan ri`ayah dalam setiap hal, tempat dan masa.

وَادْخُلُوا الْبَابَ سُجَّدًا نَغْفِرْ لَكُمْ خَطِيئَاتِكُمْ سَنَزِيدُ الْمُحْسِنِينَ.

“...dan masuklah kamu melalui pintunya dengan tunduk (merendah

diri); dan (mintalah ampun dengan) berkata: Ya Allah ampunilah dosa kami; supaya Kami ampunkan kesalahan-kesalahan kamu, dan Kami akan tambah pula pahala orang-orang yang muhsinin (berbuat baik).” **Al-Baqarah: 58**

اللَّهُمَّ رَبَّنَا ارْضَ عَنِ الْوَالِدَيْنِ. اللَّهُمَّ آمِينَ. آمِينَ. آمِينَ. آمِينَ يَا أَرْحَمَ الرَّاحِمِينَ.

“Allahumma Robbana redhoilah kedua ibu bapa. Allahumma amin, amin, amin ya Arhamar Rohimin.”

Kita teruskan pada siri kali ini dengan bicara dalam topik makrifat dan tentang Tasawuf Islami yang Sunni.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ mengungkap bicara tentang makrifat: “Makrifatmu pada Allah ialah apa yang memutuskanmu dari selain Allah dan mengembalikanmu kepada Allah Subhanahu wa Taala”.

Beliau رَضِيَ اللَّهُ عَنْهُ وَأَرْضَاهُ berkata lagi bahawa: “Ada dua ciri yang memudahkan jalan menuju Allah: (1) Makrifat (2) Mahabbah.

Cintamu pada sesuatu akan membuat engkau buta dan pekak dari selainnya. Maka hati-hatilah, jaga-jaga dan awaslah.

Beliau رَضِيَ اللَّهُ عَنْهُ وَأَرْضَاهُ berkata lagi bahawa: “Hendaklah engkau makrifat kepada Allah dan berkenalanlah kepadaNya, kemudian silakanlah engkau meminta rezeki kepadaNya dari mana-mana yang engkau suka dengan tidak bergelumang kepada yang haram dan tidak loba kepada yang halal.

“Demi kerana Allah nasihatilah para hambaNya dan janganlah engkau mengkhianati Allah pada amanahNya.

“Ibadatlah engkau kepada Allah dengan yakin nescaya engkau menjadi salah seorang imam (pemuka) agama.

“Berpindahlah engkau dari ilmu kaum jahil kepada ilmu golongan



Bekalan Murid Ke Jalan Akhirat

khossh (yang istimewa) nescaya engkau menjadi kalangan pewaris.

“Tauladanmu ada pada para utusan Allah lagi tahqiq ikutanmu itu pada para nabi عَلَيْهِمُ الصَّلَاةُ وَالسَّلَامُ.”

“Siapa yang menisbahkan, atau menambah, atau mencintai, atau membenci, atau berkasih-kasih, atau mendekati, atau takut, atau mengharap, atau senyap, atau mengamankan sesuatu, atau merasa aman dengan sesuatu selain Allah, atau melanggar satu batas yang ditetapkan Allah maka dia orang yang zalim.

“Adapun orang zalim itu tiak boleh menjadi imam. Firman Allah Tabaroka wa Taala:

إِنِّي جَاعِلُكَ لِلنَّاسِ إِمَامًا قَالَ وَمِنْ ذُرِّيَّتِي قَالَ لَا يَنَالُ عَهْدِي الظَّالِمِينَ

“...sesungguhnya aku menjadikan engkau imam (pemimpin) kepada manusia”...Ibrahim berkata: “Dan dari kalangan zuriatku juga”, maka Allah berfirman: “JanjiKu takkan dicapai oleh mereka yang zalim.” **Al-Baqarah: 124**

“Siapa yang jujur kepada Allah dalam dirinya maka dia adalah imam tidak kira sedikit riwayatnya atau banyak.

إِنَّ إِبْرَاهِيمَ كَانَ أُمَّةً

“Sesungguhnya Ibrahim (dengan seorang dirinya) adalah satu umat...” **An-Nahl: 120**

“Barangsiapa menjadi imam maka tiada mudarat baginya kalau dia seorang sudah menjadi satu umat, walau sedikit pengikutnya.” (Masya Allah, ini kalam ajaib).

Beliau رَضِيَ اللَّهُ عَنْهُ وَأَرْضَاهُ berkata lagi: “Bagaimana Dia dikenal dengan segala makrifat sedangkan dengan Dialah segala makrifat itu dikenal? Atau bagaimana Dia dapat diumpamakan dengan sesuatu sedangkan kewujudanNya mendahului wujud tiap sesuatu?”

Beliau رَضِيَ اللَّهُ عَنْهُ وَأَرْضَاهُ mengulas bicara awliya' yang berkata: "Hakikat makrifat kepada Allah adalah diri jadi terkaya dengan Allah dari sekalian manusia. Lalu ditanyakan bagaimana itu? Sedangkan Allah juga telah membuatkan NabiNya perlu kepada musuhnya?". Kata beliau رَضِيَ اللَّهُ عَنْهُ وَأَرْضَاهُ : "Maka kami jawab bahawa kalau begitu pandanglah kepada terkayanya engkau dari segala petala langit dan bumi dalam engkau berhajat kepada keduanya. Setiap yang berhajat kepadaNya Dia akan memutuskan dari keduanya. Tuhan yang mengangkat langit dari menimpamu dan menahan bumi dari menelanmu Dialah juga yang menghalang mudarat putus hubungan darimu. Dialah yang menyampaikan manfaat darinya kepadamu dan Allah menjadikan engkau berhajat kepadaNya dalam tiap perkara supaya Dia mengkayakanmu denganNya dari segala-galanya. Inilah makna firman Allah Taala:

وَاعْبُدْ رَبَّكَ حَتَّى يَأْتِيَكَ الْيَقِينُ.

"Dan ibadatlah kepada Tuhanmu hingga datang yakin padamu"

Al-Hijr: 99

"Inilah al-`iyan yang mengkayakan engkau dari keterangan dan memadam darimu ghaflah dan kelupaan.

هَٰذَاكَ تَبْلُو كُلُّ نَفْسٍ مَّا أَسْلَفَتْ وَرُدُّوْا إِلَى اللَّهِ مَوْلَاهُمْ الْحَقَّ وَضَلَّ عَنْهُمْ مَّا كَانُوا يَفْتَرُونَ.

"Pada masa itu tiap-tiap diri dapat mengetahui (dan merasai) akan apa yang telah dikerjakan dan mereka dikembalikan kepada Allah Tuhan mereka yang sebenar-benarnya (yang akan membalas dengan adilnya); dan (dengan itu) hilang lenyaplah dari mereka apa yang mereka ada-adakan." **Saiyidina Yunus: 30**

Lalu engkau berkata: "Bagaimana hamba menyembahMu dalam tiap sesuatu?" dijawab:



Bekalan Murid Ke Jalan Akhirat

Agar engkau memberi hak taslim (pasrah) tanpa keberatan.

Agar engkau memberi hak pujian tanpa sebarang cacat.

Agar engkau memberi hak minta hidayah tanpa sebarang keruh.

...yang demikian adalah makna dari firman Allah Tabaroka wa Taala:

ثُمَّ لَا يَجِدُوا فِي أَنْفُسِهِمْ حَرَجًا مِّمَّا قَضَيْتَ وَيُسَلِّمُوا تَسْلِيمًا.

"...kemudian mereka pula tidak merasa di hati mereka suatu keberatan dari apa yang telah engkau hukumkan, dan mereka menerima keputusan itu dengan sepenuhnya." **An-Nisaa': 65**

"Maka taslim (pasrah) itu hak badan, pujian itu hak lisan, meminta petunjuk denganNya hak hati

وَإِلَيْهِ يُرْجَعُ الْأَمْرُ كُلُّهُ فَاعْبُدْهُ وَتَوَكَّلْ عَلَيْهِ وَمَا رَبُّكَ بِغَافِلٍ عَمَّا تَعْمَلُونَ.

"...dan kepadaNya lah dikembalikan segala urusan. Oleh itu sembahlah akan Dia serta berserahlah kepadaNya. Dan (ingatlah), Tuhanmu tidak sekali-kali lalai akan apa yang kamu lakukan."

Saiyidina Hud: 123

Beliau رَضِيَ اللَّهُ عَنْهُ وَأَرْضَاهُ berkata bahawa: "Hakikat makrifat adalah terkayanya seorang `arif dengan ciri Allah Tuhan yang dikenalnya Dari segala yang selainNya. lalah tempat terkayanya hamba dengan Allah dari segala yang lain dari Tuhannya itu".

Beliau رَضِيَ اللَّهُ عَنْهُ وَأَرْضَاهُ berkata: "Satu ketika aku jatuh sakit di Kota Qairawan (Tunisia) lalu aku bermimpi melihat Saiyidina wa Maulana junjungan Nabi صَلَّى اللَّهُ عَلَيْهِ وَسَلَّمَ. Baginda bersabda kepadaku: "Sucikanlah pakaianmu dari kotoran, nescaya engkau akan dijaga dengan madad dari Allah pada tiap nafas", maka berkatalah aku: "Apakah pakaianku itu ya Rasulullah صَلَّى اللَّهُ عَلَيْكُمْ وَسَلَّمَ?" maka sabda Baginda:

"Sesungguhnya Allah telah mempersalinimu dengan pakaian makrifat, kemudian pakaian mahabbah, kemudian pakaian iman,

kemudian pakaian tauhid, kemudian pakaian Islam.

“Maka siapa yang kenal Allah kecillah padanya segalanya. Siapa cinta Allah remehlah padanya segalanya. Siapa mengesakan Allah takkan mensyirikkanNya dengan yang lain. Siapa beriman dengan Allah akan amanlah dia dari segalanya. Siapa yang berserah diri kepada Allah tiadalah dia akan menderhakaiNya, jika dia melakukan maksiat segera dia memohon ampunNya dan jika kepadaNya dipohon ampun nescaya Dia menerima...” maka dari sabda Baginda itu fahamlah aku makna firman Allah Taala:

وَتِيَابَكَ فَطَهِّرْ

“Dan hendaklah engkau mensucikan pakaianmu.”

Beliau رَضِيَ اللَّهُ عَنْهُ وَأَرْضَاهُ berkata: “Pernah satu ketika aku berada dalam gua (uzlah atau khalwah dengan Allah), maka berkatalah aku: “Ilahi, bilakah aku akan menjadi hambaMu yang bersyukur? Maka aku pun mendengar seruan dalam ruang gua: “Jika engkau tidak melihat pada alam kewujuan ini ada yang memberi nikmat kepadamu selain Dia, maka saat itu engkau adalah hamba yang bersyukur.” Maka berkatalah aku: “Saiyidina wa Maulana junjungan Nabi, alam ini dan kerajaanNya merupakan nikmat yang lebih besar dariku,” lalu dikatakan kepadaku: “Nabi dan alam adalah nikmat dari Allah ke atasmu. Baginda صَلَّى اللَّهُ عَلَيْهِ وَسَلَّمَ menyampaikan syariat dari Allah kepadamu. Dengan kerajaanNya perjalanan dunia jadi baik, urusan ibadatmu jadi lurus... lalu segalanya adalah nikmat dari Allah untukmu”.

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berkata mengenai bashiroh (pandangan mata hati): “Pengadaban dan pelajaran bagi diri yang punya bashiroh dalam agama Allah. Sesungguhnya ia merupakan dua perkara: (1) Sesuatu yang dibahagikan untukmu (2) Sesuatu yang ditangkis darimu.

“Barangsiapa yang menyibukkan diri dengan keduanya atau dengan salah satu darinya maka sedikitlah kefahamannya dan besarlah



jahilnya, hanyutlah akalunya dan luaslah ghaflahnya, lagi amat sedikitlah dia akan tersedar kepada siapa yang datang mengejutkannya.

“Lalu jika engkau didatangi sesuatu yang dikasihi dengan syarak, atau dengan tabiat, atau dengan keduanya, atau engkau yang mendatangnya maka itu dari bahagian pertama. Maka hendaklah engkau bersamaKu sebagai Aku membelamu atas apa yang Ku bahagikan kepadamu, nescaya Aku menjadi rahmat untukmu pada apa yang Ku tangkis darimu dan pada kejahatan yang diseret kepadamu.

“Lalu Aku menyibukkanmu dengan apa yang lebih utama bagimu dari apa yang ditolak darimu. Dan Aku merasakan bagimu kemanisan redho dengan keputusanKu hingga jadilah sesuatu yang tidak disukai lebih engkau kasihi dari segala yang dikasihi dengan tabiat dirimu. Jika engkau tidak bersamaKu dan engkau tidak menjadikan dirimu untukKu pada apa yang Aku bahagikan kepadamu nescaya Aku mewakilkanmu kepada nafsumu pada apa yang ditangkis darimu dan pada apa yang diseret kepadamu dari perkara yang tidak disukai.

“Dan sesungguhnya Allah takjub kepada hamba yang gigih menangkis apa yang ditangkiskan darinya dan menolak apa yang tidak boleh tidak mesti terjadi kepadanya.

“Maka hendaklah engkau beramal kerana Allah dengan yakin, hendaklah engkau menetapkan diri di mana Dia menetapkanmu dan hendaklah engkau menahan diri dari apa yang Dia menahanmu darinya. Ikutlah suruhan di mana Dia menyuruhmu. Tinggalkanlah apa yang dilarangNya ke atasmu atas dasar bashiroh dalam yakin

وَلَا تَكُنْ مِنَ الْغَافِلِينَ

“...dan janganlah engkau termasuk kalangan yang alpa.”

Beliau رَضِيَ اللَّهُ عَنْهُ وَأَرْضَاهُ berkata: “Jika engkau mahu memandang kepada Allah dengan bashiroh iman dan keyakinan sentiasa maka hendaklah engkau:

Menjadi orang yang syukur nikmat Allah dan

Redho dengan ketentuanNya

وَمَا بِكُمْ مِّنْ نِّعْمَةٍ فَمِنَ اللَّهِ ثُمَّ إِذَا مَسَّكُمُ الضُّرُّ فَإِلَيْهِ تَجْأَرُونَ.

“Dan apa-apa nikmat yang ada pada kamu maka adalah ia dari Allah; kemudian, apabila kamu ditimpa kesusahan maka kepadaNya lah kamu meraung meminta pertolongan.” An-Nahl: 53

“Jika engkau mahu pembelaan atau membela maka sembahlah Allah atas dasar mahabbah, bukan atas dasar perniagaan dan jual beli. Dan lagi sembahlah Allah dengan takzim dan penjagaan.”

Beliau رَضِيَ اللَّهُ عَنْهُ وَأَرْضَاهُ berkata: “Bashiroh (mata hati) itu ibarat mata lahir; apa saja walau paling kecil jika jatuh ke dalamnya akan mengganggu pandangan, walau pun tidak sampai buta.” (Ya Robbana jagalah kami dan maafkanlah kami).

“Maka lintasan dari kejahatan akan mengganggu pandangan dan mengeruhkan fikiran, dan kemahuan untuk melakukan kejahatan akan segera menghilangkan kebaikan, adapun bila kejahatan itu diamalkan ia akan menarik keluar pelakunya dari satu bahagian Islam yang dinodainya dengan kejahatan itu dan menggantinya dengan lawannya. Jika si pelaku terus menerus dengan kejahatannya meluncur keluarlah Islam dari dirinya sebahagian demi sebahagian.

“Jika kejahatan itu makin parah hingga sampai menyakiti para imam kalangan awliya’ dan solihin, hingga sampai memberi dokongan kepada para penzalim kerana mahukan kemegahan, kedudukan dan kerana lebih cinta dunia dari Akhirat maka telah lepaslah seluruh Islam darinya.

“Lalu janganlah engkau *ghurur* (tertipu) apa keelokan yang pada zahirnya; sesungguhnya itu tiada rohnya. Adapun roh Islam ialah cinta Allah, cinta RasulNya صَلَّى اللَّهُ عَلَيْهِ وَسَلَّمَ, cinta Akhirat dan cinta hamba-hamba Allah yang soleh”. (Tuan-puan sekalian! Silakanlah memberi perhatian terhadap kata-kata ringkas, berfaedah dan bermanfaat ini... Ya Robbi selamatkanlah kami dan selamatkanlah dengan kami...



Bekalan Murid Ke Jalan Akhirat

Allahumma amin).

Beliau رَضِيَ اللَّهُ عَنْهُ وَأَرْضَاهُ berkata: “Perkara yang paling diberi tumpuan pada sifat-sifatNya adalah tumpuan sebelum kewujudan. Kemudian tiliklah apakah engkau melihat bagi mata itu di mana? Atau engkau melihat pada buana ini ada sebelumnya? Atau engkau melihat pada urusan ini ada sya’nya? Demikianlah selepas wujudnya...” (Di sini Syeikh bicara tentang hakikat dan tentang khayal dari cahaya bashiroh).

Beliau رَضِيَ اللَّهُ عَنْهُ وَأَرْضَاهُ berkata bahawa bashiroh itu jadi buta kerana tiga perkara:

1. Menghantar anggota kepada maksiatkan Allah.
2. Berlakon-lakon dalam mentaati Allah.
3. Tamak pada makhluk Allah.

...lalu barangsiapa mendakwa dirinya punya bashiroh sedangkan padanya ada salah satu dari ciri ini maka sungguhlah hatinya disasari oleh sangkaan-sangkaan nafsu dan waswas syaitan.”

Saiyidina As-Syeikh Al-Kamil As-Syazili رَضِيَ اللَّهُ عَنْهُ وَأَرْضَاهُ berbicara mengenai Tasawuf Islami yang Sunni itu dengan katanya: “Bahawa Tasawuf itu adalah:

- Melatih jiwa atas jalan ubudiyah

إِنْ أَوْلِيَاؤُهُ إِلَّا الْمُتَّقُونَ وَلَكِنْ أَكْثَرُهُمْ لَا يَعْلَمُونَ.

“...sebenarnya orang-orang yang berhak menguasainya (para awliya’nya) hanyalah orang-orang yang bertaqwa, tetapi kebanyakan mereka tidak mengetahui.” **Al-Anfaal: 34**

- Mengembalikan jiwa kepada hukum hakam rububiyah

فَاعْلَمُوا أَنَّ اللَّهَ مَوْلَاكُمْ نِعَمَ الْمَوْلَىٰ وَنِعَمَ النَّصِيرِ.

“...maka ketahuilah bahawasanya Allah Pelindung kamu; Dia lah sebaik-baik Pelindung dan sebaik-baik Penolong (yang

menyelamatkan dan menjayakan kamu)." **Al-Anfaal: 40**

Beliau رَضِيَ اللَّهُ عَنْهُ وَأَرْضَاهُ وَتَقَعَتَا اللَّهُ بِهِ berkata: "Seorang sufi itu punya empat sifat: (1) Berakhlak dengan akhlak Allah (2) Berjiran baik dengan perintah-perintah Allah (3) Tidak memenangkan diri sendiri kerana malu dengan Allah (4) Melazimi hamparan dan pintu dengan kejujuran dalam fana' bersama Allah

اسْتَعِينُوا بِاللَّهِ وَاصْبِرُوا إِنَّ الْأَرْضَ لِلَّهِ يُورِثُهَا مَنْ يَشَاءُ مِنْ عِبَادِهِ وَالْعَاقِبَةُ لِلْمُتَّقِينَ

"Mintalah pertolongan kepada Allah dan bersabarlah, sesungguhnya bumi ini kepunyaan Allah, diwariskannya kepada sesiapa yang dikehendakiNya dari hamba-hambaNya; dan kesudahan yang baik adalah bagi orang-orang yang bertaqwa." **Al-A'raaf: 128**

ادْخُلُوا عَلَيْهِمُ الْبَابَ فَإِذَا دَخَلْتُمُوهُ فَإِنَّكُمْ غَالِبُونَ وَعَلَى اللَّهِ فَتَوَكَّلُوا إِنْ كُنْتُمْ مُؤْمِنِينَ.

"Masuklah kamu kepada mereka (seranglah mereka) melalui pintu itu, kerana apabila kamu memasukinya maka sudah tentu kamulah orang-orang yang menang; dan kepada Allah jualah hendaknya kamu berserah (setelah kamu bertindak menyerang), jika benar kamu orang-orang yang beriman" **Al-Ma'idah: 23**



PENUTUP

Insya Allah kami akan terus berbicara tentang Tasawuf Islami yang Sunni dan peranannya dalam menghidupkan hati insani.

يَا أَيُّهَا الَّذِينَ آمَنُوا اسْتَجِيبُوا لِلَّهِ وَلِلرَّسُولِ إِذَا دَعَاكُمْ لِمَا يُحْيِيكُمْ

“Wahai orang-orang yang beriman, sahutlah seruan Allah dan RasulNya apabila dia menyerumu kepada perkara yang menjadikan kamu hidup...” **Al-Anfaal: 24**

Aku takkan meninggalkan tugas menulis di bumi Tasawuf ini...

فَلَنْ أَبْرَحَ الْأَرْضَ حَتَّى يَأْذَنَ لِي أَبِي

“...oleh itu, aku tidak sekali-kali akan meninggalkan bumi (Mesir) ini sehingga bapaku mengizinkan daku...” **Saiyidina Yusuf: 80**

... dan makna bapaku adalah syeikhku dan mursyidku. Dalam hadis junjungan Saiyidina wa Maulana Baginda Nabi صَلَّى اللهُ عَلَيْهِ وَسَلَّمَ:

أَنَا جَدُّ كُلِّ نَفْقِيٍّ.

“Aku adalah datuk bagi setiap orang bertaqwa”.

...maka ayohai anak muda, carilah siapa bapamu. Allah jua yang Maha Menunjukkan dan Dialah yang menyelamatkan.

فَالَّذِينَ آمَنُوا بِهِ وَعَزَّرُوهُ وَنَصَرُوهُ وَاتَّبَعُوا النُّورَ الَّذِي أُنْزِلَ مَعَهُ ۙ أُولَٰئِكَ هُمُ
الْمُفْلِحُونَ.

“...maka orang-orang yang beriman kepadanya dan memuliakannya, juga menolongnya serta mengikut nur (cahaya) yang diturunkan kepadanya, mereka itulah orang-orang yang berjaya.” Al-A’raaf: 157

Allahumma Robbana jadikanlah kami sekalian dari golongan yang jaya, menang, cemerlang dan dari kalangan umat Baginda, yang mengikut *millah* Baginda. Bangkitkanlah kami dalam kelompok Baginda, dan muliakanlah kami dapat bersama Baginda junjungan ﷺ. Allahumma amin. Dan redhoilah wahai Tuhan ya Robbana akan syeikh kami, yaitu murobbi jasad dan rohaniku lagi pemilik nikmatku Saiyidina Abdun Nasir Al-Jaza`iri Al-Hasani As-Syazili, juga sekalian masyaikhnya dan kedua ibu bapa mereka semua, ya Arhamar Rohimin.

وَصَلَّى اللَّهُ عَلَى سَيِّدِنَا وَمَوْلَانَا مُحَمَّدٍ وَعَلَى آلِهِ وَصَحْبِهِ وَسَلَّمَ تَسْلِيمًا. سُبْحَانَ
رَبِّكَ رَبِّ الْعِزَّةِ عَمَّا يَصِفُونَ وَسَلَامٌ عَلَى الْمُرْسَلِينَ وَالْحَمْدُ لِلَّهِ رَبِّ الْعَالَمِينَ.



Bekalan Murid Ke Jalan Akhirat



Bekalan Murid Ke Jalan Akhirat



Bekalan Murid Ke Jalan Akhirat